

Rom

Rom niŋ Yesuyen alya bereya hitte Pol belem asan kayyinj

1 ¹Nebe Pol, Yesu Kristuyen meten al. Al Kurun belem meremin igin Yesu niŋ yitin goyen tagal tagal niŋ ten ne gayen batin nirde Yesuyen mere basan al aposel niryin. ²Be, mere igin Yesu niŋ yitin gobe Yesu megen gar ma wakeya bikken wor po Al Kurun belem Urmin goke bin ten mere basan marmin porofet yinke Al Kurunyen asan wukken wor po bana gon kayamin go goyen. ³Al Kurun Urmin al hiriŋ gobe Israel marte doyan al kurun Dewityen minde mat forok yirin. ⁴Goyenbe Al Kurun belem Holi Spirityen tarende al goyen kamtinde mat isan hekeb yenbe Al Kurun Urmin goyen kawan wor po hiriŋ. Yenbe Yesu Kristu nende Doyan Al Kurun. ⁵Urmin meten tiyyin goke tenbe neya meten kadne yagoya gayen Al Kurun belem buninen dirde igin igin dirde aposelmin diryin. Go diryin gobe Urmin goke ten Yuda mar mon al min hoyan kurun goyen hitte tagalde tukun hitekeb yen ge dufaymin tareŋ irde meremin gama irde hinayin yenbe gogo aposelmin diryin. ⁶Den wor al min hoyan Yuda mar mon bana mat hoy dirtin geb, Yesu Kristuyen yufukde han mar hitin han.

⁷Ningeb asan gabe den Rom niŋ alya bereya tumnan Al Kurun belem bubulkunne wor po yen nurd dunenbe, “Nere kudin enenayin,” yen hoy diryin goke asan gago kan hime.

Adoninin Al Kurunya Doyan Al Kurun Yesu Kristuya belem buninen dirde igin igin dirdeb bitin yisikamke igin po hiwon yen nurde hime.

Polbe Rom niŋ mar yenmewon wor po yen nuryin

⁸Be, asan kan hime gayen bana mere mehende wor po momon diren tihim gobe gahade: den belem Yesu Kristu niŋ dufaytin sanin irtin han gote mere momontinbe megen kurun gayen ep hen tukun hi. Ningeb nebe matatin goke Al Kurun igin wor po nurd unen himyen. Go ten himyen

gobe Yesu Kristu belen faran nurkeb gogo ten himyen. ⁹⁻¹⁰Fudinde, Al Kurun gusujan irde henya huginen den ge bene sir ma yen hiyen gobe Al Kurun wor fudinde yen nurde hi. Al Kurun nin meten ten hime gabe bener mat fudinde wor po mere igin Urmin goke yitin goyen tagalde tukun himyen. Irde den hitte kun kun nin kurut yen himyen gega, go ma kun dinmirin geb, gayenterbe Al Kurunyen dufayde kenem den hitte kun kun nin belen kerd nunwon yen nurde gusujan irde hime.

¹¹Fudinde, nebe den goyen Holi Spirityen tarende mata forok yird yird gote taren nuntin goyen kura dunmeke sanin hewon yen nurdeb den hitte kun dentek wor po nurde hime. ¹²Gogab denya neya tumnan henbe ne belen Yesu nin dufayne taren irde himyen goyen den belen nenenbe taren henayin, irde ne wor den dufaytin Yesu nin sanin irtin goyen denenbe taren hewen. ¹³Goyenbe, kadne yago, nebe den hitte kun dene yen wawun budamde kurut yen himyen gega, belen minmon wor po nirde hike wan wan gago hihi goyen nurwon yen nurde hime. Nebe al min hoyan Yuda mar mon naja hoyande han mar hitte kun meten ten gote iginen yawarde hinhem gwahade goyen po, den hitte wor kun meten ten gote iginen yawarmewon yenbe gogo den hitte kun kun nin kurut yen himyen.

¹⁴Be, nebe Grik marya^a al min hoyan Grik mar monya hitte kun meten ten ten gobe bada hetek epte mon, meten go titek po hime. Irde al dufaymin wukkek ma dufaymin wukkek mon goke meten ten hayin ninyin geb, goyen goke manan meten ten hitek po himyen. ¹⁵Gwahade ningeb den Rom nin mar hitte wor kun Yesu nin yitin mere igin goyen tagaltek wor po nirde hi.

¹⁶Fudinde, Yesu nin yitin mere gobe Al Kurunyen taren geb, al kura mere go fudinde yen nurde gama irde han mar goyen igin Al Kurun hitte yumulgan titek hi. Yumulgan tiyyen mar goyen mehenbebe Yuda mar wa yawaryen, irde gab Yuda mar mon al min hoyanbe kame yawaryen. Ningeb goke tenbe Yesu nin yitin mere igin tagal tagal nin memya ma hen hime. ¹⁷Al Kurun belen Yesu nin yitin mere goyen hende huwardeb yingen dilinge al huwak hen hen belen goyen kawan forok irde hi geb, mere igin gobe Al Kurunyen sanin dinen hime gago. Al Kurunbe al kura Yesu nin dufaymin taren irde hinayin mar go po gab al huwak yen yinyen. Al huwak hen hen belen hoyanbe hubu wor po. Ningeb goke Al Kurunyen asande gahade katin hi:

“Al kura Al Kurun nin dufaymin taren irke Al Kurun belen al huwak yen kinyen al gobe Al Kurunya huginen hiriryen,” yitin hi.

Habakuk 2:4

^a 1:14 Grik marbe megen nin alyen saba karkuwan yawartin mar yen nurde yunen hanyen. Munan al min hoyanbe gwahade yawartin mar mon yen nurd yunen hanyen.

Al Kurunbe alyen mata bulun goke bin ar yen hiyen

¹⁸Goyenpoga megen nin alya bereyabe Al Kurun palap irtek mata ma ten mata bulun po ten han. Go mar gobe mata bulun tenbe Al Kurunyen mere fudinde goyen pel irde han. Goke tenbe Al Kurun sanjimin kurun wor po gore beararmin yikala yirde hiyen. ¹⁹Al Kurunbe al gwahade yen al belej kenej bebak tinayin yenbe kawan po yikala yirtin geb, al belej Al Kurunbe gwahade yen kenkela nurd untek po han. ²⁰Al Kurunyen mataya tarejmin hubu ma hetek goya gobe al dilinde epte ma yenej bebak titek. Goyenpoga det Al Kurun belej yirtin goyen yenejbe matamin ya tarejmin ya gobe gwahade yen bebak titek. Ningeb al kura belej epte ma, “Nebe Al Kurun ma nurde unen hime,” yiyyen.

²¹Al belej Al Kurunbe al gwahade yen nurde hinhan gega, yenbe Al Kurun yen denem turun yan ma irde, igin nurd unen unen mata ma ten hinhan. Dufaymin gote iginejbe hubu wor po. Dufayminbe kukuwamnen wor po geb, kidoma bana han yara Al Kurunyen mere fudinde goyen epte ma bebak titek hinhan. ²²Mel gobe dufay wukkekninin yan yen hinhan gega, kukuwa po hen hinhan. ²³Irdeb Al Kurun gwahader hitin goyen denem turun yan irtinejbe harhok unen al yingen haniinde det tonej yirtin kame hubu hetek goyen Al Kuruninin yen turun yirde hinhan. Det tonej yirde hinhan gobe al, nu, dapna, irde det megen gargar kun hitin gote tonej yirde doloj yirde hinhan.

²⁴Ningeb Al Kurun belej matamin goke yenej unan tikeb dufaymin bulun go po gama irde mata bulun kurun po ten hinhan. Gwaha yirkeb megen nin mata bulun titek dufaymin go po gama irde lelep mata ten yingen goyen bulun wor po yirde hinhan. ²⁵Mel gobe Al Kurunyen mere fudinde goyen gama irtinejbe usi mere gama irde hinhan. Irde Al Kurun, det kurun gayen yiriyin al goyen doloj irde yen ge meten titnejenbe yen belej yiriyin det goyen yade doloj yirde goke meten ten hinhan. Goyenbe huginen turun irtek albe Al Kurun, yen unken po. Fudinde wor po.

²⁶Be, mel gobe mata gwahade ten hinhan geb, gogo Al Kurun belej yubul tike mata memyak ten ten dufay belej po haga yuriny. Gwaha yirkeb berebe un yagoya ulin gabu ird ird belnen wor po goyen tubul tenbe bere yingen ulin sikken gabu yirde hinhan. ²⁷Gwahade goyen po, al dirin wor berem yagoya ulin gabu ird ird belnen fudinde goyen tubul tenbe al yingen ulin sikken gabu ird ird nin po pultik yen hinhan. Al yingen ulin mata bulun mormok memyak wor po goyen ten henbe gote murungem bulun wor po gobe bikken taminyen hinhan.

²⁸Goyenbe go po mon. Albe Al Kurun nurd unen unen nin igin ma nurde hinhan geb, yen belej yubul tike yingen de dufay bulun go po gama irde mata bulun Al Kurun belej bisam irtin goyen ten hinhan.

²⁹Be, gwaha ten hike bindebe mata huwak monya mata bulunya det

ugun po yad yad nin po dufay hej hej matayabe dufay bulunja kurayen kurayen gore po makin hitij hinhan. Irde kadom igin mat hike yenenbe daniñ neñ gwahade moñ yey nurd nurd mata, al gasa yirke kamde kamde mata, fuleja mata, al usi yird yird mata, al bulun yird yird mataya al yiya yird yird matayabe kurun wor po. ³⁰Go mar gobe mere bulun mat tej tej mata, Al Kurun nin igin ma nurd unej unej mata, parpar mata, neñ nurhet nurhet matayabe, yingen ge turun turun tej tej mataya tej hinhan. Irde mata bulun tinen yingen forok yirde hinhan. Irdeb miliña naniñyat mere ma nurde hinhan. ³¹Go mar gobe dufay igin minmoñ, irde mere kura tej go ma gama ird ird mata, al hoyañ nin amañen ma nurd nurd matayabe, al hoyañ buniñen nurd yunen yunen matabe hubu wor po. ³²Mata go tej hañ marbe Al Kurun beleñ gasa yirke kamnayin yey Al Kurunyen saba sanij huwak wor po goyenter yitij gobe nurde hanjen gega, mata bulun go tej tej nin bada ma heñ hanjen. Goyenbe go po moñ. Mel gobe al kura diliñde mata goyen tej hike yenenbe, “Mata igin tahañ,” yinen turun yirde hanjen.

Mata bulun marbe Al Kurun beleñ merem yañ yiryen

2 ¹Ningeb deñ megen nin marbe mata bulunñinin ga moñ yey kadtiñde mata kura yenen goke tagal yunen hañ gobe igin ma tej hañ. Kadtiñde mata goke yey hañ gobe dindiken wor mata bulun gwahade po tej hañ geb, meretin goreb dindiken goyen po merem yañ dirde hi. ²Al Kurun beleñ mata gwahade tej hañ mar goyen merem yañ yiryen gobe mali mali ma yiryen, mata bulunmin goyen kenkela bebak yirdeb merem yañ yiryen yey nurde hite. ³Ningeb deñ megen nin mar beleñ al kura mata bulun tikeb goke tagalde hanjen gega, deñ wor mata bulun goyen tej hanjen kenem Al Kurun beleñ matatin goke merem yañ ma diryen yey nurde hañ? ⁴Irde Al Kurun beleñ igin igin dirke mata bulunñin yubul tej Al Kurun nin bitin mulgañ hamin goyen bebak ma tej hañ? Ningeb yey beleñ igin igin dirde mata bulunñin goke arañen ma merem yañ dirdeb bitin mulgañ hewon yey doyañ heñ heñ ge pinen ma heñ hiyen goyen det dirnen yey nurde hañ?

⁵Goyenpoga denbe tonanñin taren wor po, irde mata bulunñin yubul tej Al Kurun nin bitin mulgañ hetek dufay ma heñ hañ geb, mata bulun tej tebañ tej hikeb mata bulunñin kurun wor po heñ hi. Gwaha tej hike kun kun nalu funañ forok yekeb Al Kurun beleñ mata bulunñin kurun goke bearar tej goke merem yañ wor po diryen. Yey beleñ merem yañ diryen gobe huwak mat diryen geb, al kura beleñ goke daniñ gwaha taha intek moñ. ⁶Al Kurunbe megen nin alya bereya kurun gayen matamin dahade tej hitij gobe murungem wor gwahade po yunen. ⁷Al kura huginen mata igin po tej henya Al Kurun denem turnun yañ irde palap irde yeny huginen hiwon yenbe gwahade heñ heñ beleñ nin nankenen

haŋ marbe Al Kurun beŋ yingenya huginen heŋ heŋ mata goyen yunyen. ⁸Gega al kura yingen ge po nurde haŋ marya Al Kurunyen mere fudinde pel irde mata bulun po gama irde haŋ maryabe Al Kurunyen bearar bana po heŋ gote murungem bulun wor po tenayin. ⁹Ningeb al kura Al Kurun dilingde mata bulun ten haŋ marbe tumnan kanduk kurun bana heŋ bin misin wor po nurde hinayin. Mata gwahade gobe Yuda mar hitte forok yiyyen, irde Grik mar hitte wor forok yiyyen. ¹⁰Munan al kura Al Kurun dilingde mata igin ten haŋ marbe tumnan Al Kurun beŋ deŋem turnun yan yirde, turun yirde, bin yisikamke igin po hinayin. Mata gwahade gobe Yuda mar hitte forok yiyyen, irde Grik mar hitte wor forok yiyyen. ¹¹Al Kurunbe al min kura po igin yirde al min hoyanbe bulun yirde ma ten hiyen geb, gogo al tumnan hitte gwahade po forok iryen.

¹²Be, Yuda mar mon al min hoyan Moseyen saba ma nurdeya ga mata bulun ten haŋ marbe Al Kurun beŋ gwamun yuryen gega, Moseyen saba go hende ma huwarde gwamun yuryen. Munan Yuda mar, Moseyen saba nurdeya ga mata bulun ten haŋ marbe Moseyen saba go hende huwarde merem yan yiryen. ¹³Gobe Moseyen saba dulin nurde haŋ marbe Al Kurun dilingde huwak mon, munan saba goyen nurde gama irde haŋ marbe al huwak yen yinyen geb, gago dineŋ hime. ¹⁴Be, al min hoyan Yuda mar mon Moseyen saba go ma nurde haŋ mar kurabe ma nurde henya saba goyen gama irde hanjen. Al gwahade gobe yingen Moseyen saba goyen nurtin yara geb, Moseyen sabare mata gwaha gwaha ten hinayin yitin goyen binde po pul yeke gama irde hanjen. ¹⁵Go ten haŋ gobe mel gore ma nurde hikeya bin bana Moseyen saba goyen kirtin yara haŋ goyen dikala dirde haŋ. Irde mata bulun ninbe binde mat bulun yen nurde haŋ, munan mata igin ninbe igin yen nurde haŋ. ¹⁶Be, Al Kurun beŋ al merem yan yird yird gobe nalu funande forok yiyyen. Go nalurebe Al Kurun beŋ Yesu Kristu inke alyen dufay bulun banare hitin goyen kawan yirde goke merem yan yiryen. Yesu nin yitin mere igin ne beŋ tagalde himyen gore mere gayen kawan po dikala dirde hi.

Yuda marya Moseyen sabaya

¹⁷Be, den haŋ bana goyen al kura beŋ, “Nenbe Yuda mar. Irde Al Kurun beŋ saba Mose unyin goyen kenkela gama irde hityen geb, nen po gab Al Kurunya awalikde hite,” yen yingen ge turun turun ten hanjen. ¹⁸Go mar goreb, “Nenbe Al Kurunyen dufay kenen bebak ten hityen. Irde Moseyen saba gama irde igin mat po mata ten hityen geb, daminbe igin munan daminbe bulun goyen kenkela bebak ten hityen,” yen hanjen. ¹⁹Irdeb, “Nenbe al kura diling titmin yara Al Kurun nurde unen unen beŋ ma kenen haŋ mar goyen beŋ yikala yirde hityen. Irde mata bulun gote kidoma bana haŋ mar gote hulsi yara nenbe Al Kurunyen mere kenkela bebak yirde hityen,” yen hanjen. ²⁰Irde

Moseyen saba bana mere fudinde gobe nurd pasi hitin yen nurdeb, “Al dufaymin kukuwamnen marte mata sope irde, al kura dirin kalak yara Al Kurunyen mata kenkela ma bebak ten han mar goyen saba fudinde yirde hityen,” yen hanyen.

²¹ Goyenpoga den gwahade nurde al hoyan saba yirde han marbe dahade ningeb dindikenbe sabatin goyen gama ma yirde han? Al hoyanbe kawe ma ten hinayin yinen han gega, dindikenbe dani kawe ten han? ²² Den bele al hoyanbe, “Al berem yanbe bere hoyanya duwan ten ten mata ma ten hinayin,” yinen han gega, denbe go mata goyen ten han. Irde det tone yirtin goyen dolon yird yird matamin goke bulun wor po nurd yunen han gega, dani geb det tone dolon yird yird gasunde kun detmin kawe ten han? ²³ Denbe Moseyen saba nurde han go mun goke turun turun ten han gega, sabamin goyen pel irde mata bulun ten han goreb Al Kurunyen denem bulun irde han. ²⁴ Den Yuda marte mata gokeb Al Kurunyen asande gahade katin hi: “Den gore mata bulun tikeb al min hoyan Yuda mar mon bele denenbe Al Kurun nanyan irde han,” yitin.

²⁵ Be, den bele Moseyen saba kenkela gama irde han kenem guba yen yen mata gobe min minyan hiyyen. Goyenpoga sabamin go walde han kenem guba yitin han gobe min minmon hen al min hoyan Yuda mar mon yara henayin. ²⁶ Gega al min hoyan Yuda mar mon gore Moseyen saba kenkela gama irde hinayin kenem mel gobe guba ma yitin gega, Al Kurun dilingdebe guba yitin yara henayin. ²⁷ Ningeb al min hoyan Yuda mar mon guba ma yitin goreb Moseyen saba kenkela gama irde hinayin gobe go mar goreb den Yuda mar Moseyen saba kenkela nurtin irde guba yitin gega saba pel irde han mar goyen kame Al Kurun dilingde huwarde merem yan dirnayin.

²⁸ Fudinde, al kura Yuda marte mata gama irdeb ulinde po Yuda mar al hiyyen, goyenpoga Al Kurun dilingdebe Yuda mar al fudinde ma hiyyen. Ulinde po guba yiyyenbe epte ma Yuda mar al fudinde hiyyen. ²⁹ Ningeb al kura binde mat wor po Al Kurun nurd unen han mar go po gab Yuda mar fudinde wor po. Irde Al Kurun dilingde guba yen yen mata fudindebe dulin Moseyen saba hende hendem po gama irde sisihik walde hinayin gogo mon. Guba yen yen mata fudindebe Holi Spirit bele al binde dufayya mataya gergen yiryen gogo. Al gwahade gobe al megen nin bele ma turun yirnayin. Al Kurun bele po gab turun yirde hiyen.

Al Kurunyen mata huwak

3 ¹ Be, Yuda marbe gwahade geb Yuda mar al hen hen gote iginenbe dahade? Irde guba yen Yuda mar henayin gote iginen iginbe dahade go goyen tenayin? ² Fudinde, Yuda mar hittebe det igin budam han. Goyenbe det igin budam han bana goyen det kurun wor pobe Al Kurun bele Yuda mar goyen basin yirdeb meremin yunyen gogo.

³Goyenpoga Yuda mar kurabe Al Kurun belen meremij yunyiñ goyen binde mat fudinde yeñ ma nurdeb gama ma iramiñ. Gwahade ningeb mel gote matamiñ goke Al Kurun belen igiñ ma nurdeb bikkenj mel gote biña tiyyiñ goyen walyeñ? ⁴Epte moñ wor po. Megen niñ marbe gwaha gwaha titek yeñ biña teñ hanjen goyen ma gama irde usi po teñ hanjen gega, Al Kurunbe mere teñbe goyen po gama irde hiyen. Ningeb goke teñbe Al Kurunjen asañde gahade katiñ hi:

“Doyañ Al Kurun, ge belen merere huwarde mere tikeb mata huwakge kawan hiyyeñ,

irde al kura belen usi tiya gintek ma hayiñ,” yitiñ. *Tikiñ 51:4*

⁵Goyenbe megen niñ marte matare gaha yewen geb, mere gabe igiñ ma bulun goyen dufay henañ ko. Mere gobe gahade: Al Kurunbe al huwak wor po goyen nende mata bulun belen kawan wor po irde hi kenem goke daha yetek? “Daniñ mata bulunniñ goke Al Kurun belen bearar teñbe gote murunjem bulun duneñ hi? Gobe igiñ ma tiya!” yetek? ⁶Moñ, epte ma gwaha yetek! Munañ mere goyen fudinde manhan megen niñ marte mata bulun gote murunjembe epte ma yunwoñ. ⁷Gega al kura belen dufaymiñ soñ hekeb, “Ne belen usi mata timekeb gore Al Kurunbe mata fudinde po teñ hi goyen kawan iryeñ. Irkeb deñem turunjan yan hiyyeñ. Goyenbe dahade geb Al Kurun belen mata bulun al nineñ merem yan niryeñ? Epte moñ!” yiyyeñ. ⁸Mere gobe kukuwamneñ wor po. Mere gobe, “Kame mata igiñ forok yeñ yeñ ge teñ mata bulun teñ hitek,” yeñ hanjen go goya tunande. Goyenbe al kura belen neñ gayen mere bulun mat dird dird niñ teñbe neñ ge yeñ, “Mel gore al saba gwahade yirde hañ,” dineñ hañ. Ningeb go mar gobe Al Kurun belen mere teñ hañ gote murunjem bulun wor po yuntek mata goyen gogo teñ hañ.

Megen niñ marbe tumñan mata bulun minjan

⁹Be, gwahade ningeb neñ Yuda marbe al miñ hoyañ Yuda mar moñ gote folek? Moñ. Ne belen mehenje Yuda mar ma al miñ hoyañ wet kura goyen tumñan mata bulun bana hañ dinhem gogo. ¹⁰Be, mere gokeb Al Kurunjen asañde gahade katiñ hi:

“Al Kurun diliñde al huwakbe hubu wor po.

Al kura huwak ma po hi.

¹¹Al kura Al Kurunjen mere bebak ma po teñ hi. Hubu wor po.

Al unjukan mun kura Al Kurun niñ ma nankenen hi.

¹²Al tumñan soñ heñ mata bulunde kattin geb,

Al Kurunjen meten epte ma titek hañ.

Al unjukan mun kura mata igiñ titek ma hi. Hubu wor po.”

Tikiñ 14:1-3; 53:1-3; Eklisiastis 7:20

¹³“Al hapekbe al mete titek gasun yara geb, meremij gore al hoyañ bulun yirde hi.

Irde melak beleŋbe usi mere po teŋ hi.”

Tikiŋ 5:9

“Irde dinonŋdebe kunere duwi beleŋ al yisike kamde hanŋyen det goyen hanŋ.”

Tikiŋ 140:3

14 “Mohonŋdebe al karan yurde al biŋ misiŋ kattek mere beleŋ po making hi.”

Tikiŋ 10:7

15 “Kahanŋbe hugiŋeŋ al gasa yirke kamde kamde niŋ po aranŋeŋ kuŋ hanŋ.

16 Yeŋ beleŋ naŋa damde kunayiŋ kuŋuŋ gobe hugiŋeŋ al buluŋ yirde, kanduk kuŋuŋ wor po yuneŋ hanŋ.

17 Yeŋbe al biŋ kamke igiŋ heŋ heŋ beleŋbe go ma nurde hanŋ.”

Aisaia 59:7-8

18 “Go mar gobe Al Kuŋuŋ niŋ kafura ma heŋ hanŋ,” yitiŋ hi. *Tikiŋ 36:1*

19 Be, neŋbe Moseyen saba bana mere yitiŋ kuŋuŋ gobe saba gote yufuk bana hanŋ mar goke yitiŋ yeŋ nurde hite. Gogab megen niŋ al kura beleŋ mata buluŋmiŋ goke epte ma, “Nebe al huwak,” yiyyeŋ, irde megen niŋ mar tumŋaŋ Al Kuŋuŋ diliŋde uliŋde merem yaŋ henayiŋ. 20 Niŋgeb al kura Moseyen saba tumŋaŋ gama irtek miŋmoŋ geb, al tumŋaŋ epte ma Al Kuŋuŋ diliŋde al huwak henayiŋ. Gwahade yarabe Moseyen saba goreb mata buluŋniniŋ kawan dikala dirke yeneŋ bebak teŋ hityen.

Al Kuŋuŋ diliŋde huwak heŋ heŋ beleŋ

21 Niŋgeb Al Kuŋuŋ diliŋde al huwak heŋ heŋ beleŋ hoyan dikala dirtiŋ hi. Gobe Moseyen saba moŋ. Beleŋ goke bikkeŋ Mose beleŋ sabamiŋde tagalyiŋ, irde Al Kuŋuŋyen mere basan mar porofet wor goke tagalamiŋ.

22 Niŋgeb al kura Yesu Kristu niŋ dufaymiŋ tareŋ irnayiŋ marbe tumŋaŋ Al Kuŋuŋ beleŋ al huwak yinyeŋ. Yesu niŋ dufaymiŋ saŋiŋ irtiŋ mar bana kurabe huwak, munan kurabe huwak moŋ ma yinyeŋ. Tumŋaŋ tuŋande ala al huwak yinyeŋ. 23 Fudiŋde, al tumŋaŋ Al Kuŋuŋ diliŋde mata buluŋ titiŋ ala geb, Al Kuŋuŋyen tareŋ turŋuŋ yaŋ bana epte ma hitek hanŋ.

24 Gega Al Kuŋuŋ beleŋ buniŋeŋ yirde igiŋ igiŋ yirde hiyen geb, Yesu Kristu beleŋ yumulgan teŋ teŋ beleŋ kirtiŋ goyen gama irde hinayiŋ marbe al huwak yeŋ yinyeŋ. Goyenbe gwahade heŋ heŋ gobe muruŋgem moŋ, duliŋ gwahade hinayiŋ. 25 Al Kuŋuŋbe al kura Yesu Kristu beleŋ yeŋ ge teŋ darim wok irde kamyiŋ goke dufaymiŋ tareŋ irkeb mata buluŋmiŋ halde yuneŋ yeŋ Yesu goyen teŋ kerke katiŋ. Irde alyen mata buluŋ niŋ teŋ dapŋa gasa yirde Al Kuŋuŋ galak irtiŋ yara hiriŋ. Al Kuŋuŋ beleŋ go tiyyiŋ gobe matamiŋ huwak goyen Urmiŋ uliŋde kawan forok iryiŋ. Kawan forok iryiŋ gobe Al Kuŋuŋ beleŋ bikkeŋ al mata buluŋ teŋ hinhan goyen goke ma nurde aranŋeŋ bearar ma teŋ gote muruŋgem ma yuneŋ hinhide mat gogo matamiŋ huwak goyen kawan forok iryiŋ. 26 Al Kuŋuŋ beleŋ Yesu uliŋde mata buluŋniniŋ gote muruŋgem unyiŋ gobe Al Kuŋuŋbe al huwak goyen kawan dikala dird dird niŋbe gogo tiyyiŋ.

Gwaha tiyyin al gobe al huwak wor po. Irde al kura Yesu nin dufaymin sanjin irnayin marbe tumnan al huwak yen yinyen goyen kawan dikala diren yenbe gogo tiyyin.

²⁷Ningeb neŋ albe da mataninin goke turun turun ten hitek? Irde belŋen damin go goyen gama irde al huwak hetek? Moseyen saba gama irde Al Kurun dilingde al huwak hetek? Epte mon! Yesu nin dufayninin tareŋ irteke gab Al Kurun beleŋ al huwak yen dinyen. ²⁸Fudinde, albe epte ma Moseyen saba gama irde Al Kurun dilingde al huwak henayin yen nurde hite. Yesu nin dufaymin tareŋ irde gab al huwak henayin yen nurde hite. ²⁹Be, Al Kurun gayen Yuda marte Al Kurun po? Yenbe al min hoyan Yuda mar mon gote Al Kurun mon? Mon geb! Yenbe al min hoyan gote Al Kurun manan geb. ³⁰Ga yihim gabe Al Kurunbe unkuŋen po geb, gago yihim. Ningeb Yuda mar guba yen hanŋen goya al min hoyan guba ma yen hanŋen goya goyen Yesu nin dufaymin sanjin irnayinbe tumnan Al Kurun dilingde huwak yen yinyen. ³¹Be, gwahade ningeb neŋbe Yesu nin dufayninin tareŋ irde hiten geb, Moseyen sababe pel irde mali mali mata titek? Mon, epte ma gwaha titek. Neŋ beleŋ Yesu nin dufayninin tareŋ irde hitekbe Moseyen saba gote min kurun goyen tumnan gama irde pasi hetek.

Abrahambe al huwak

4 ¹Be, Abrahambe neŋ Yuda marte asininin. Ningeb Abrahambe daha tiyyin goyen goke nurtek. Gogab Yesu Kristu nin dufay sanjin ird ird mata goyen bebaŋ titek. ²Be, Abrahambe mata igin ten hinhin gore Al Kurun dilingde al huwak iryin manhan matamin goke yingen ge turun turun tiwoŋ. Gega matamin goke kura Al Kurun dilingde turun turun titek mon hinhin. ³Ningeb goke Al Kurunyen asanŋe dahade katin hi? Merebe gahade: “Abraham go Al Kurun beleŋ mere iryin goyen fudinde yen nurdeb dufaymin tareŋ iryin. Irkeb Al Kurun beleŋ go keneŋbe al huwak yen nurd unyin,” yitin hi.

⁴Be, al kura meten tikeb meten gote min al gore murunŋem unyen. Ningeb murunŋem gobe meten tiyyen gote damum geb, dulin una ma yetek. ⁵Goyenpoga Al Kurunbe al kura mata igin tiyyen goke al huwak ma inyen. Gwahade yarabe al kura Al Kurun beleŋ mata bulun mar goyen igin al huwak yiryen yen nurde yen ge dufaymin tareŋ irkeb goke Al Kurun beleŋ al go al huwak yen nurd unyen. ⁶Ningeb Israel marte doyan al kurun Dewit manan al kura Al Kurun beleŋ al gote meten dahade tiya goke ma nurdeb al huwak inyen al gobe Al Kurun beleŋ guram irde sanjin irtin al wor po yen nurdeb gaha yirin:

⁷“Al kura Al Kurun beleŋ mata bulunmin halde unenbe mata bulun minmon inyen al gobe amanen wor po nurde hiyen.

⁸Irde al kura Doyan Al Kurun beleŋ mata bulunmin goke ma nuryen al gobe amanen wor po nurde hiyen,” yitin hi. *Tikin 32:1-2*

⁹Be, Al Kurun belen gwaha mat guram yirde tarej yirtek marbe Yuda mar guba yen hanjen goyen po guram yiryen? Ma, al min hoyan Yuda mar mon guba ma yen hanjen goyen manan guram yiryen? Tumnan guram yiryen geb. Be, Abraham nin nurnan. Nenbe, “Abraham belen Al Kurun nin dufaymin tarej irke Al Kurun belen al huwak inyin,” yihit. ¹⁰Gega Abrahambe daha nanan Al Kurun dilingde al huwak hiri? Guba yirin kamere ma guba ma yirinya? Yen al huwak hiri gobe guba ma yirinya al huwak hiri. ¹¹Irdeb kame gab guba yiri. Guba yiri gobe yen belen guba ma yinya Al Kurun nin dufaymin sanin iryin goke ten Al Kurun belen al huwak inyin gobe fudinde yen bebak ten ten nin gogo guba yiri. Ningeb yenbe al kura guba ma yiti gega, Al Kurun nin dufaymin tarej irde han mar kurun gote nanin hitin hi. Gobe go mar goyen Al Kurun dilingde al huwak yen nurd yunen yenbe gogo Al Kurun belen Abraham goyen gwaha iryin. ¹²Irde Abrahambe al guba yen hanjen marte nanin manan. Goyenbe tumnan mon. Guba yiti mar bana gon al kura Abraham belen guba ma yinya Al Kurun nin dufaymin tarej iryin mata goyen gama irde han mar gote nanin hitin hi.

Al Kurunbe bina tiyyin goyen gama iryin

¹³Be, Abrahamya fonenmin yagoyabe kame megen kurun gayen ten gote min mar henayin yen Al Kurun belen Abraham dilingde bina tiyyin gobe Abraham gore Moseyen saba gama irde hike gogo bina tiyyin? Mon. Gwaha titnenbe Al Kurun nin dufaymin sanin irke gab al huwak inenbe gogo bina tiyyin. ¹⁴Ningeb Al Kurun belen bina tiyyin goyen Moseyen saba gama irde ga tetek manhan Al Kurun nin dufay tarej ird ird gobe min minmon hewon. Irde Al Kurun belen Abraham hitte bina tiyyin goyen wor min minmon hewon. Goyenpoga gwahade mon. ¹⁵Moseyen sababe hi gega, al belen goyen ma gama irde hikeb goreb Al Kurunyen bearar bana yukun hiyen. Goyenbe Moseyen saba goyen minmon manhan al belen mata kura tike mata bulunbe gogo taha ma inen hiwon.

¹⁶Ningeb albe Yesu Kristu nin dufaymin tarej irke gab Al Kurun belen bikken detmin yunen yen bina tiyyin goyen yunen. Gogab Al Kurun belen buninen yirde igin igin yirdeb detmin dulin yunen yen bina tiyyin goyen Abrahamyen asem wen dufaymin yen ge sanin irnayin mar goyen tumnan fudinde wor po tenayin. Al kura Yuda mar Moseyen saba bana han gore Yesu Kristu nin dufaymin tarej irtin kenem yenbe Abrahamyen dirnen wen geb, Al Kurun belen yen ge bina tiyyin goyen tenayin. Irde al kura al min hoyan Moseyen saba bana ma han gore Yesu Kristu nin dufaymin tarej irtin kenem yen wor Abrahamyen dirnen wen geb, yen wor tenayin. ¹⁷Ningeb gokeb Al Kurunyen asande gahade katin hi: “Ne belen al min kurayen kurayen kame forok yenayin kurun gote asem girhem,” yiti. Ningeb Abraham gobe Al Kurun dilingdeb adoninin.

Abraham gobe Al Kurun beleŋ al kamtiŋ wor igiŋ yisaŋ hiyyeŋ, irde det miŋmoŋ wor pore mat det forok yiryen yeŋ dufaymiŋ yeŋ ge saŋiŋ iryiŋ. ¹⁸Abrahambe gwaha mat kura diriŋ miŋyaŋ heweŋ yeŋ ma nurde hinhinya goyenter Al Kurun beleŋ biŋa teŋya, “Asige yagobe budam wor po henayiŋ,” inyiŋ goyen fudinde yeŋ nurde diriŋ niŋ doyaŋ heŋ hinhin. Niŋgeb Al Kurun beleŋ inyiŋ gwahade po, al miŋ kurayen kurayen kurun gote asem hiriŋ. ¹⁹Be, yeŋ hitte diriŋ forok ma yekeyabe damam 100 heŋ alik buluŋ po heŋ gwaha mat kura diriŋ forok irtek ma hiriŋ. Irde berem Sara wor gwahade po diriŋ yad yad nalumbe fole wor po tiyyiŋ. Gega Abrahambe Al Kurun beleŋ diriŋ ma nuneŋ hi yeŋ dufaymiŋ tareŋ ird ird goyen yul ma yiriŋ. ²⁰⁻²¹Yeŋbe Al Kurun beleŋ yeŋ ge biŋa tiyyiŋ goke hekkeŋ nurdeb dufay budam ma iryiŋ. Irdeb Al Kurun beleŋ biŋa tiyyiŋ kurun goyen igiŋ forok irde nunyeŋ yeŋ nurde hinhin geb, yeŋ ge dufaymiŋ tareŋ irde hinhin gore saŋiŋ irkeb Al Kurun deŋem turuŋ yaŋ irde hinhin. ²²Niŋgeb Al Kurun beleŋ dufaymiŋ tareŋ goyen keneŋbe, “Yeŋbe al huwak,” yiriŋ. ²³Goyenbe Al Kurun beleŋ asaŋmiŋde mere bilmiŋ “Yeŋbe al huwak,” yiriŋ gobe Abraham yeŋ ge po ma yiriŋ. ²⁴Mere gobe neŋ gayen gake manaŋ yiriŋ. Neŋbe Doyaŋ Al Kuruniniŋ Yesu kamyiŋde mat isaŋ hiriŋ al Al Kurun goke dufayniŋ tareŋ irde hite geb, al huwak yeŋ nurd dunyeŋ. ²⁵Yesube nende mata buluŋ niŋ teŋ kamyiŋ. Irkeb Al Kurun beleŋ neŋ gayen diliŋde al huwak dire yeŋ Yesu go kamyiŋde mat isaŋ heke huwariŋ.

Al huwak heŋ heŋ niŋ hoy diriŋ

5 ¹Be, gwahade niŋgeb Yesu niŋ dufayniŋ saŋiŋ irtekeb Al Kurun beleŋ al huwak diniŋ. Niŋgeb neŋbe Doyaŋ Al Kuruniniŋ Yesu Kristu hitte mat Al Kurunya awalikde hite. ²Neŋ beleŋ Yesu niŋ dufayniŋ tareŋ irtekeb Yesu Kristu gore Al Kurun beleŋ buniŋeŋ dirde igiŋ igiŋ dird dird bana hurkuŋ hurkuŋ beleŋ kerd dunyiŋ. Irkeb neŋbe go bana hite gago. Irde kame Al Kurunyeŋ tareŋ turuŋ yaŋ bana hitek yeŋ nurde goke doyaŋ heŋ hite geb, amaŋ heŋ hityen. ³Irde kanduk kurayen kurayen yeneŋ hite gega, amaŋ heŋ hityen. Gobe kanduk gore saŋiŋ dirkeb kanduk hoyan kura wayyeŋ gega, yul ma yeŋ hitek, ⁴irde kanduk yeneŋ yul ma yetekbe mata buluŋ titek dufay goyen igiŋ fole irde hitek, irde mata buluŋ titek dufay goyen igiŋ fole irde hitekbe kame Al Kurun beleŋ goke igiŋ igiŋ diriŋ yeŋ goke doyaŋ heŋ hitek geb, gogo kanduk kurayen kurayen yeneŋ hityen gega, amaŋ heŋ hityen. ⁵Be, Holi Spirit Al Kurun beleŋ dunyiŋ gore Al Kurun beleŋ neŋ gayen bubulkuŋne wor po yeŋ nurde duneŋ hiyen goyen fe wogortiŋ yara irde dunyiŋ. Niŋgeb Al Kurun beleŋ igiŋ igiŋ diriŋ yeŋ goke doyaŋ heŋ heŋ gobe miŋ miŋmoŋ yeŋ ma nurde hite.

⁶Fudinde, neŋbe mata buluŋ bana po heŋ gwaha mat kura nindikeŋ sope irtek miŋmoŋ wor po hitekeyabe Al Kurun beleŋ nalu goyenter

gwaha tiyen yirinyab Yesu Kristu belen Al Kurun ma nurd unen mata bulun ten han mar nin ten kamyin. ⁷Fudinde, al kura al huwak kura goke ten igin kamen yen yenbe metenen wor po. Al igin kura goke ten igin kamtek yen han mar wor budam mon, yunkurenen po han. ⁸Goyenpoga Yesu Kristube nen gayen mata bulun bana po hitekeya nen ge ten kamyin. Al Kurunbe nen gayen bubulkune wor po yen nurde dunen hiyen goyen gwaha matbe dikala dirtinyen hi.

⁹Ningeb nenbe Yesu Kristu belen darim wok irde kamyin go hende al huwak hitin geb, kame Al Kurunyen bearar bana mat nen gayen fudinde wor po dade sina diryen. ¹⁰Bikken nen gayenbe Al Kurunyen asogo hinhet gega, Urmin ten kerke katen kamyinde matbe Al Kurunya awalik hitirin. Gega Urminbe bida ma hen huwaryin geb, Al Kurun belen kame daha diryen? Dumulgan po tiyyen geb! ¹¹Goyenbe go po mon. Nenbe Doyan Al Kuruninin Yesu Kristu belen Al Kurunya awalik dirtin hite geb, goke gayenterbe Al Kurunya hen amangen nurde hite.

Adamyu Yesu Kristuya

¹²Be, gwahade goyen po al unken Adam belen mata bulun tikeb mata bulun megen gar forok yirin. Irkeb mata bulun gote murungembe kamde kamde mata forok yirin. Irkeb gor mat al tumnan mata bulun ten hinhan geb, tumnan kamde kamde bana po hinhan. ¹³Be, Moseyen saba ma forok yirinya wor mata bulunbe hinhan. Gega goyenterbe mata bulun ten hinhan gobe mata bulun yen ma nurde hinhan. ¹⁴Goyenpoga Adamyen nalure mat wan Moseyen nalure hinhan mar wor tumnan kamamin. Al kura Adam belen Al Kurunyen mere pel irde mata bulun tiyyin gwahade ma tiyamin mar wor tumnan kamde kamde mata gote yufuk bana hinhan.

Ningeb Adambe matamin gote iginen bulun goyen alya bereya megen han kurun gayen hitte forok iryin al. Gega al kura kame forok yirin al gobe matamin gote iginen igin goyen alya bereya kurun gayen hitte forok iryin. Ningeb Adambe mata bulun forok iryin al, munan kame wayyin al gobe mata igin forok iryin al. ¹⁵Gega Al Kurunyen buninen dufay goya Adamyen mata bulunyabe tunande mon, hoyan hoyan. Fudinde, al unken Adam gote mata bulunde mat al budam kamde hinhan. Goyenpoga Al Kurun belen al buninen yirde igin igin yirde yirde gobe kurun wor po, mata bulun gote folek wor po. Irde al unken Yesu Kristu gore al buninen yirde igin igin yirde kamyin go wor kurun wor po. Yen kamyin gobe Al Kurun belen detmin damum mon dulin al yunyen go goyen. ¹⁶Be, det yunen yen Al Kurun belen damum mon dulin al yuntin gobe al unken Adam belen mata bulun tike gote murungem titin gwahade yara mon. Gobe gahade: al unken belen mata bulun tikeb gor mat al merem yan yirde murungem yunen yunen mata forok yirin.

Goyenpoga al budam mata buluŋ kurayen kurayen titiŋ mar hitte Al Kuruŋ beleŋ detmiŋ damum moŋ duliŋ yuntek goyen yunkeb goreb Al Kuruŋ diliŋde al huwak yiryiŋ. ¹⁷Be, al uŋkureŋ Adam beleŋ mata buluŋ tiyyiŋde matbe matamiŋ goke teŋ albe kamde kamde mata yufuk bana hinhan. Gega al kura Al Kuruŋ beleŋ buniŋeŋ yirde igiŋ igiŋ yird yird bana heŋ al huwak hitiŋ marbe Al Kuruŋya hugiŋeŋ heŋ det kuruŋ gayen doyaŋ yirde hinayiŋ. Mata gobe al uŋkureŋ Yesu Kristu beleŋ forok iryiŋ. Al huwak heŋ heŋ gobe det kura Al Kuruŋ beleŋ damum moŋ duliŋ al yuneŋ yiriŋ go goyen. ¹⁸Niŋgeb Adamyen mata buluŋ uŋkureŋ^b goyen misiŋdebe al tumŋaŋ mata buluŋ mar heŋ gote muruŋgem tamiŋ gega, Yesu Kristuyen mata huwak uŋkureŋ^c goreb Al Kuruŋya hugiŋeŋ heŋ heŋ goyen al tumŋaŋ hitte forok ird yuntiŋ. ¹⁹Al uŋkureŋ Adam beleŋ Al Kuruŋyen mere pel iryiŋ go misiŋde al budam mata buluŋ mar hitiŋ gega, al uŋkureŋ Yesu Kristu beleŋ Al Kuruŋyen mere gama iryiŋ go hendebe al budam al huwak henayiŋ. ²⁰Moseyen sababe al tumŋaŋ mata buluŋmiŋ kuruŋ wor po goyen yeneŋ bebak tinaŋ yeŋ duntiŋ. Goyenpoga mata buluŋbe kuruŋ po heŋ hi geb, Al Kuruŋ beleŋ buniŋeŋ yirde igiŋ igiŋ yird yird matabe hubu heŋ hi? Hubu hitiŋ yarabe kuruŋ heŋ mata buluŋ gote tareŋ fole ird hi. ²¹Gogab mata buluŋ misiŋde albe kamde kamde mata yufuk bana hitiŋeŋbe Doyaŋ Al Kuruŋniniŋ Yesu Kristu hitte mat Al Kuruŋ beleŋ buniŋeŋ dirde igiŋ igiŋ dirde al huwak dirkeb Al Kuruŋya hugiŋeŋ hitek.

Nenbe Yesu Kristuya kamtiriŋ

6 ¹Be, gwahade niŋgeb daha yetek? Al Kuruŋ beleŋ igiŋ igiŋ dird dird goyen kuruŋ po hiwi yeŋbe mata buluŋ teŋ teŋ niŋ bada ma hetek yiniŋ? ²Gwahade moŋ po! Al kamde detmiŋ tumŋaŋ yubul teŋ haŋyen gwahade goyen po, neŋ wor mata buluŋbe tumŋaŋ yubul titiriŋ. Niŋgeb mata buluŋ beleŋ epte ma doyaŋ dirde hiyeŋ geb, megen gar epte ma mata buluŋ teŋ heŋya hitek! ³Nenbe tumŋaŋ Yesu Kristuya uŋkureŋ heŋ heŋ ge baptais titiriŋ gote miŋbe yeŋya uŋkureŋ heŋ kamtiriŋ yara gobe nurde haŋ gogo. ⁴Be, nenbe gwahade po baptais titiriŋ goya goyenbe Yesu Kristuya heŋ kamteke mete dirtiŋ yara hitiŋ. Gogab Yesu Kristu goyen Naniŋ beleŋ saŋiŋmiŋ turuŋ yaŋ wor po gore isaŋ hiriŋ gwahade goyen po, neŋ manan gwaha dirke Al Kuruŋ diliŋde al gergeŋ heŋ hitek. ⁵Be, nenbe gwaha mat Yesu Kristuya uŋkureŋ heŋ kamtiriŋ kenem yeŋ huwariŋ gwahade goyen po, neŋ wor fudiŋde Al Kuruŋ beleŋ disaŋ heke huwartek. ⁶Niŋgeb Yesu Kristu kuruse hende mayke kamiŋ

^b 5:18 Al Kuruŋ beleŋ mata igiŋya buluŋya bebak teŋ teŋ he igiŋeŋ ma nawayiŋ inyiŋ goyen meremiŋ pel ird niriŋ goke yitiŋ. ^c 5:18 Mata huwak uŋkureŋ gobe Al Kuruŋyen mere gama ird kuruse hende kamiŋ goke yitiŋ.

goyenter dufayninin bikkek megen niŋ goyen manan kamyin yeŋ nurde hite. Gogab neŋ gayen mata bulun beleŋ epte ma wor po danarde bon yeke gote yufukde hitek. ⁷Gobe al kura Yesu Kristuya kuruse hende kamaryum al gobe Al Kurun beleŋ mata bulun bana mat teŋ siŋa iryin geb, gogo mata bulun yufuk bana ma hi.

⁸Be, neŋbe Yesu Kristuya tumnan kamtirin kenem al gergeŋ heŋ yeŋya hite gayenbe fudinde wor po yeŋ nurde hite. ⁹Gobe Yesu Kristube kamtinde mat huwaryin geb, sopte ma kamyen yeŋ nurde hite geb, gago dinen hime. Fudinde, kamde kamde mata beleŋ epte ma tanaryen. ¹⁰Be, Yesu Kristu kamyin gobe mata buluninin pasi ire yeŋbe gogo kamyin. Goyenbe wawun unŋkurenge po kamyin. Irde Al Kurun deŋem turun yan ird ird niŋ hi. ¹¹Ningeb deŋ wor gwahade po kamamin geb, mata bulun yufukde ma hite yeŋ nurdeb Yesu Kristuya heŋ Al Kurun deŋem turun yan ird ird niŋ hinayin.

¹²Ningeb tubul tike mata bulun beleŋ ultin kame kamke bida hetek goyen tanarde ma hiyeŋ. Gwaha ma tinayinbe mata bulun titek dufay goyen po gama irde hinayin geb. ¹³Ningeb tubul tike ultin kurhan kura gore mata bulun teŋ tende niŋ det ma hiyyeŋ. Gwaha titneŋbe kamtinde mat huwarde al gergeŋ hitin han geb, ultin goyen Al Kurun beleŋ mata huwakde niŋ det irde meten unyeŋ yeŋ Al Kurun unnayin. ¹⁴Deŋbe Moseyen saba gote yufuk bana ma han. Al Kurun beleŋ bunineŋ dirde igin igin dirde hi bana goŋ han. Ningeb mata bulun beleŋ epte ma wor po doyan dirde hiyeŋ.

Neŋbe mata huwak teŋ teŋ mar

¹⁵Ningeb daha titek? Neŋbe Moseyen saba gote yufuk bana ma hite, irde Al Kurun beleŋ bunineŋ dirde igin igin dirde hi bana goŋ hite geb, mata bulun teŋ hitek? Moŋ, epte ma gwaha titek! ¹⁶Be, deŋbe al kurate meten mar dulneŋ heŋ yende yufukde hitek yeŋ nurde gwaha tinayinbe al gote mere po gama irde meten dulneŋ teŋ teŋ mar henayin goyen go ma nurde han? Gwahade goyen po, deŋ beleŋ mata bulun gama irde hinayinbe gote yufuk bana heŋ Al Kurun dilinde al kamtin hinayin. Munan Al Kurunyen mere nurde gama irde hinayinbe gote yufukde heŋ al huwak henayin. ¹⁷⁻¹⁸Be, bikkeŋ deŋbe mata bulun yufuk bana po heŋ gote meten mar hinhan. Goyenpoga gayenterbe Al Kurunyen mere saba dirke nurdeb bitinde mat fudinde wor po gama irde han. Irkeb yeŋ beleŋ mata bulun bana mat dad siŋa dirde mata huwak yufuk bana dirtin han. Ningeb goke Al Kurun igin wor po nurd uneŋ hite. ¹⁹Mere tihim gayen dindikeŋ kenkela bebak titek moŋ geb, megen niŋ marte matare mat momoŋ direŋ tihim. Be, bikkeŋ deŋbe ultin kurhan kura mata bulun Al Kurun dilinde tikiŋ minyan goke uneŋ hinhan. Irde mata kura Al Kurunyen mere ma nurde hanyen marte mata gama irke mata buluntinbe

kurun wor po hej hinhin. Gwaha ten hejbe mata bulun kurun gote yufuk bana po hinhan. Gega gayenterbe ulin goyen tumnan yumulgan ten mata huwak nin unnayin. Irdeb yende yufukde hej mata huwak ten hinayin. Irkeb Al Kurun dilingde wukken dinyen.

²⁰Be, bikken den goyen mata bulun yufuk bana hej gote meten mar hinhanyabe mata huwak gote yufuk bana ma hej mata huwak goke dufay ma hej hinhan. ²¹Go mata ten hinhan goke gayenterbe memyak nurde han. Goyenpoga gwaha ten hinhanyabe iginen igin dahade kura yawaramin? Hubu wor po. Fudinde, mata ten hinhan gote murungem funandebe kamde kamde gogo po. ²²Gega gayenterbe Al Kurun beken mata bulun bana mat dumulgan tike Al Kurunen meten mar hitin han. Ningeb gor mat Al Kurun dilingde wukkek hetek mata go po ten tenbe kame gote murungembe Al Kurunya huginen hej hej mata goyen tenayin. ²³Gwahade goyen po, mata bulun gote murungembe huginen kamde kamde gogo. Munan Doyan Al Kuruninin Yesu Kristuya hej hej goke ten detmin kura Al Kurun beken damum mon dulin duntin gobe yenya huginen hej hej gogo.

Nenbe Moseyen saba yufuk bana ma hite

7 ¹Be, kadne yago, denbe Moseyen saba nurde han geb merene gayen kenkela bebak tinayin yen Moseyen saba go hende mere diren tihim. Be, albe diling henya po Moseyen saba gote yufuk bana hinayin gobe nurde han gogo. ²Be, goke ire unyat matatare mat dikala diren. Be, Moseyen sabarebe bere un yanbe un goyen diling hikeyabe un yufuk bana po hiyen. Gega un goyen kamkeb Moseyen sabare bere gobe un goya po hiriyen yitin goyen yufuk bana ma hiyen. ³Nengeb un diling hikeya al hoyan hitte kuyen gobe bere gobe lenfot innayin. Gega un kamkeb Moseyen sabare unya po hiriyen yitin goyen yufuk bana ma hiyen geb, al hoyan tiyyen goke lenfot ma innayin.

⁴Nengeb, kadne yago, denbe Yesu Kristuya han goke tenbe yenya kuruse hende kamamin yara hamin han geb, Moseyen saba gote yufuk bana ma han. Gwahade hitin yarabe kamtinde mat huwayin al Yesu gote yufuk bana han. Gwahade han gobe gote iginen mata igin Al Kurun hitte forok yird unen hini yenbe gogo gwahade han. ⁵Hankapa megen nin dufay po gama irde hinhetyabe Moseyen saba gore mata bulunbe gwahade yen kawan yirde hinhin. Gega mata goyen bebak ten yubul titnenbe mata bulun goyen ten ten nin bininin harde hinhin. Irkeb dufay bulun goyen gama irde mata bulun ten hiteke gote murungem bulun, Al Kurun dilingde huginen kamde kamde goyen tetek hitirin. ⁶Goyenpoga gayenter nenbe Yesu Kristuya kamtinen geb, Moseyen saba gote yufuk bana ma hite. Bikkenbe saba gore fere dirtin hinhet gega, gor mat dade sin dirtin. Ningeb Moseyen saba bikkek asande katin goyen hende

huwardeya ma Al Kurun niŋ meten ten hite. Holi Spirit beŋen mata gerŋen dunten goyen hende huwarde meten ten hite.

Moseyen sabaya mata bulunya

⁷Be, gwahade niŋgeb Moseyen saba gobe bulun yetek? Epte mon! Moseyen saba gore mata bulun nikala ma niryin manhan mata bulunbe dahade goyen beba ma timewon. Niŋgeb Moseyen sabare, “Al hoyande det yenen gone yan hemewon yen ma nurnayin,” gwaha ma yitin manhan mata gobe bulun yen ma nurmewon. ⁸Goyenpoga Moseyen sabare, “Al hoyande det yenen gone yan hemewon yen ma nurnayin,” yitin mere goyen nurdeb mata bulun go tubul titekdebe mata bulun gore bene fakamke al hoyande det yenen gone yan hemewon yen nurd nurd dufay kurayen kurayen forok yen hanŋen. Moseyen saba go minmon manhan mata bulun wor kamtin yara tareŋ minmon hiwon. ⁹Bikken Moseyen saba ma nurde hinhemyabe nebe al igin mata bulunne mon yen nurde hinhem. Gega saba gore gwaha gwaha ten hinayin yitin goyen nurmirin gega, saba kurun goyen epte ma kenkela gama irtek yen beba tenbe nebe mata bulun al yen nurmirin. Gobe mata bulun kamtin goyen sopte gereŋ hitin yara. ¹⁰Gor mat nebe Al Kurun dilinde kamtin hime yen nurmirin. Niŋgeb Moseyen saba gore ne gayen Al Kurunya huginen heŋ heŋ beŋen kerd nuntin yarabe huginen kamde kamde beŋen kerd nuntin yen nurmirin. ¹¹Fudinde, mata bulun beŋen usi nird nird beŋen niŋ nankenenbe Moseyen saba goyen hende harde usi nirke mata bulun ten hinhem. Niŋgeb Moseyen sabare, “Mata bulun gote murungembe kamde kamde gogo,” yitin go gwahade po, Al Kurun dilinde kamtin hinhem. ¹²Niŋgeb Moseyen sababe bulun? Mon! Moseyen saba go mun pobe Al Kurun dilinde wukkek, irde go bana mere wor wukkek, huwak, irde igin wor po.

¹³Niŋgeb det igin goyen gore ne hitte kamde kamde mata forok irde nunyin? Mon, hubu wor po! Mata bulun po ga kamde kamde mata forok ird nunyin. Moseyen saba gobe igin gega, mata bulun gore po ga saba go hende kamde kamde mata forok ird nunyin. Gobe mata bulun go fudinde kawan forok yen yen ge Al Kurun beŋen tubul tike gogo kamde kamde mata forok ird nunyin. Gogab Moseyen saba bana mere yitinde gor matbe mata bulun gobe fudinde bulun wor po yen kawan henayin.

¹⁴Be, Moseyen sababe Al Kurun hitte mat watin yen nurde hite. Gega nebe megen niŋ al po, mata bulun beŋen damu nirtin yara yen yufuk bana po himyen. ¹⁵Irde mata igin po tiye yen nurde himyen gega, gwaha ma ten himyen. Gwaha titenbe mata gwahade titek ma nirde hiyen goyen po ten himyen. Niŋgeb nebe mata gwaha ten hime yen ma nurde himyen, kukuwamŋen wor po. ¹⁶⁻¹⁷Goyenbe mata kura titek ma nirde hi gega, mata goyen tiyenbe mata go ten ten gote minbe ne mon. Mata bulun ne

bana hi gore tenj hi. Ningeb Moseyen saba yingenbe iginj goyen fudinde yenj nurde hime. ¹⁸Ga dinen hime gabe bene bana dufay iginj kura ma hi yenj nurde hime geb, gago yenj hime. Fudinde, ne megen ninj al banabe dufay iginj kura ma hi. Ningeb gogo mata iginj titek dufay minyan gega, goyen gama irde mata tenj tenj gobe metenjen wor po nirde hiyen. ¹⁹Mata iginj tiye yenj nurde himyen goyen titek yarabe mata bulun po tenj himyen. Mata bulun titek ma nirde hiyen gega, goyen po tenj himyen. ²⁰Ningeb ne mata gwaha ma titek nurde himyen mata goyen tenj himyen gobe nigen ma tenj himyen. Mata bulun tenj tenj dufay ne bana hi gore tenj hiyen.

²¹Ningeb go mata gobe nigenjen wor po kenenjen bebak tenj himyen. Mata gobe gahade: ne belejen mata iginj kura tiye yenj nurenjen goya goyenbe mata bulun tenj tenj dufay wor ne bana hi. ²²Gobe gahade: Al Kurunjen belejen bene bana dufay iginj forok ird nuntinjen geb, Al Kurunjen saba goke amanjen nurde himyen. ²³Goyenpoga bene bana kurhanbe saba hoyanjen bulun kura hi geb, gore mata bulun yufukde nerde fere nire yenje Al Kurunjen saba bener iginj nurd unenjen himyen goya arde hike nurde himyen. ²⁴Goke tenjenbe neb gwaha kura tenj iginj hewenjen yenj ma nurde hime geb nigenjen ge buninjen wor po nurde hime. Ningeb ganunjen al belejen gab mata bulun bana po henjen kattek henjen hime al gayen nad sinjen nirke iginj hewenjen? Hubu wor po! ²⁵Gega Al Kurunjen belejen Doyanjen Al Kurunjeninjen Yesu Kristu inke ne gayen mata bulun bana mat nad sinjen niryinjen geb, goke amanjen nurd unenjen hime.

Ningeb nebe gahade hime: nebe dufay gergenjen nuntinjenbe Al Kurunjen saba gama irde hime. Gega megen ninjen dufay bulunjen belejen mananjen nulunjen tenj hi.

Holi Spiritya henjen henjen mata

8 ¹Ningeb al kura Yesu Kristuya hanjen marbe Al Kurunjen belejen mata bulunminjen gote murungem ma yunenjen. ²Gobe Yesu Kristuya hireke al gergenjen nirtinjen Holi Spirit gote sanjen gore mata bulunya kamde kamdeyat tarenjen bana mat nad sinjen niryinjen geb, gago dinenjen hime. ³Nenjenbe megen ninjen dufay bulunjen goyen minyanjen marjen geb, Moseyen sabaren yitinjen goyen epte ma kenkela gama irtek hite. Ningeb Moseyen saba gore epte ma iginj dirtek hinhen. Irkeben Al Kurunjen belejen mata bulunneninjen halde dunenjen yenjenbe Urminjen tenjen kerke katenjenbe nenjen gahade ga po henjen forok yirinjen. Irde mata bulunneninjen ge tenjen yingenjen Al Kurunjen galak iryinjen. Irkeben Al Kurunjen belejen megen ninjen martenjen mata bulunjen goyen Yesu Kristu ulinjen irde alyenjen mata bulunjen gote murungem unyinjen. ⁴Al Kurunjen belejen metenjen go tiyyinjen gobe Moseyen sabaren mata huwak ninjen yitinjen goyen nenjen hitte kenkela wor po forok yenj hiyenjen yenjenbe metenjen gogo tiyyinjen. Ningeb nenjenbe megen ninjen dufay bulunjen go ma gama irdeben Holi Spirityenjen dufay po gama irde hityen.

⁵Be, al kura megen ninjen dufay gama irde hanjen marbe ulinjen amanjen hetek dufay goyen po gama irde hitek nurde hanjen. Goyenpoga al kura Holi

Spirityen dufay gama irde haŋ marbe Holi Spirit beleŋ igiŋ nurde hitek mata goyen po teŋ hitek nurde haŋyen. ⁶Fudinde, al kura megen niŋ dufay gama irde hiyen al gobe Al Kurunŋ diliŋde kamtiŋ hiyen. Gega Holi Spirit beleŋ dufaymiŋ doyaŋ irde hiyen al gobe Al Kurunŋ diliŋde al gergeŋ heŋ biŋ kamke igiŋ hiyen. ⁷Gega megen niŋ dufay po gama irde hiyen al gobe Al Kurunŋ asogo irde hiyen. Go al gobe Al Kurunŋyen saba gama ma irde hiyen. Irde epte ma gama irtek hiyen. ⁸Al gwahade megen niŋ dufay bulunŋ beleŋ doyaŋ yirteŋde po haŋ marbe epte ma wor po Al Kurunŋ beleŋ amaŋeŋ nurtek mata goyen teŋ hinayiŋ.

⁹Gega deŋ banabe Holi Spirit hi geb, megen niŋ dufay beleŋ ma doyaŋ dirde hi. Holi Spirit beleŋ doyaŋ dirde hi. Gega al kura Holi Spirit miŋmoŋ kenem al gobe Yesu Kristuyen al moŋ. ¹⁰Gega deŋ goyen Yesu Kristuya haŋ kenem mata bulunŋ niŋ teŋ ultiŋbe bida henayiŋ gega, Al Kurunŋ diliŋde al huwak henayiŋ geb tontiŋbe yenya hinayiŋ. ¹¹Irde Al Kurunŋ Yesu Kristu kamtiŋde mat isaŋ hiriŋ al gote Holi Spirit beleŋ deŋ bana hi kenem Yesu kamtiŋde mat isaŋ hiriŋ al Al Kurunŋ beleŋ Holi Spirit dunyeŋ. Irke ultiŋ bida henayiŋ goyen kame sopte gergeŋ yirke hugiŋeŋ hinayiŋ.

¹²Niŋgeb, kadne yago, neŋbe yeŋ beleŋ gwaha diryiŋ goke wol hetek mata kura hi. Mata gobe megen niŋ dufay bulunŋ ulniŋde amaŋ hetek goyen ma po gama irde hitek go goyen. ¹³Gobe megen niŋ dufay gama irde hinayiŋbe Al Kurunŋ diliŋde kamtiŋ hinayiŋ gega, ultiŋde mata bulunŋ teŋ teŋ dufay goyen Holi Spirityen tareŋde yubul tinayiŋbe Al Kurunŋya hugiŋeŋ hinayiŋ geb, gago diŋeŋ hime. ¹⁴Be, Al Kurunŋ dirŋeŋ weŋ fudinde wor pobe Al Kurunŋyen Holi Spirit beleŋ doyaŋ yirde yukunŋ hi mar gogo. ¹⁵Al Kurunŋ beleŋ Holi Spirit dunyiŋ gobe bikkeŋ kamde kamde niŋ kafura heŋ hinhan dufay bana goŋ sopte mulgaŋ heŋ heŋ ge ma dunyiŋ. Gwahade yarabe dirŋeŋ weŋ heŋ heŋ ge Holi Spirit dunyiŋ. Niŋgeb yende saŋiŋde Al Kurunŋ goyen eke merere, “Ado, Ado” ineŋ hityen. ¹⁶Fudinde, Holi Spirit neŋ bana hi goreb bininiŋde wor po, “Deŋbe Al Kurunŋyen dirŋeŋ weŋ,” diŋeŋ hiyen. ¹⁷Irde neŋbe Al Kurunŋyen dirŋeŋ weŋ kenem kame yende det gote miŋ mar hiniŋ. Goyenbe kanduk Yesu Kristu beleŋ yinyiŋ gwahade neŋ manaŋ goyen bana hitek. Gogab Al Kurunŋyen tareŋ turunŋ yaŋ wor po yeŋ beleŋ Yesu Kristu untiŋ goyen neŋ manaŋ tetek. Irkeb yenya nenya tumŋaŋ Al Kurunŋyen det gote miŋ mar hiniŋ.

Kame Yesu Kristu tareŋmiŋ turunŋ yaŋ kentek

¹⁸Be, Al Kurunŋyen saŋiŋ turunŋ yaŋ wor po kame neŋ hitte forok yiyyeŋ gobe igiŋ wor po geb, gayenter kanduk yeneŋ hite gabe det dirŋeŋ yeŋ nurde hite. ¹⁹Fudinde, tareŋmiŋ turunŋ yaŋ gobe fudinde wor po forok yiyyeŋ geb, megenya naŋkiŋya, irde det kurunŋ gayen gare dagehen

ga Al Kurun belen dirnen wen kawan forok yirke yentek yen nurdeb goke po doyan hen han. ²⁰ Megenya nankinya, irde det kurun gayenbe Al Kurun belen dufaymin kiryin goyen gama ird ird nin son hamin gobe momjonde ma son hamin. Al belen mata bulun tikeb det kurun gayen wor Al Kurunyen dufay gama ird ird nin son hamin. Gwaha tiyamin gobe Al Kurun belen gwahade po henayin yen dufay kiryin geb, gogo tiyamin. Goyenpoga sopte igin hetek nalu nin doyan hen hanjen. ²¹ Goyen nalureb det kurun gayenbe bulun hitinde mat Al Kurun belen sopte yade gergen wor po yiryen. Irde Al Kurun dirnen wen gobe mata bulun yufukde mat yad sija yirke Al Kurunyen taremin turun yan goyen bana hinayin gwahade goyen po, det kurun gayen wor gwahade po hen hinayin.

²² Be, det kurun Al Kurun belen yiryin gabe bulun hitinde mat wan wan gayenter wor bulun hitin goyen bana po hen ulin misin nurde han gobe nurde hite. Yen ulin misin nurde hanjen gobe bere kura dirin kawan kere yen ulin misin katen hiyen go gwahade goyen. ²³ Goyenbe yen po mon. Nen manan bininin bana misin nurde hityen. Nenbe Al Kurun belen dunen yen bin tiyyin gote iginen mehende wor po Holi Spirit goyen titirin mar. Goyenpoga nen gayen wor kanduk bana hen misin nurde hityen. Irde misin nurde henyabe Al Kurun belen nen gayen dirnen wen wor po dirde ulninin manan bulun hitinde mat gergen wor po yiryen yen goke po doyan hen hityen. ²⁴ Nenbe kame Al Kurun belen gwaha dirnen yen nurde doyan hen hinhet geb, Al Kurun belen dumulgan tiyyin. Gega det kura tetek yen goke doyan hen hityen goyen bikken titin kenem goke ma doyan hen hitek. Ganun al belen det kura bikken titin goyen temewon yen nurde goke doyan hen hiyen? Hubu wor po. ²⁵ Gega nenbe det kura yawartek goyen go ma yawartin geb, goke doyan hen hityen gega, goke pinen ma hen hityen.

²⁶ Be, nen gayen kanduk bana hite gega, Al Kurunyen sanin turun yan wor po goyen goke doyan hen hen goreb tarej dirde hiyen gwahade goyen po, Holi Spirit wor nen dufayninin tarej mon gayen faran durde hiyen. Nenbe goke kura Al Kurun gusunjan irtek yen ma nurde hityen gega, Holi Spirit yingen po nende gasun ten Al Kurun esen mere irde hiyen. Yenbe gwaha ten henyabe nen ge buninen wor po nurdeb binde misin kurun katen henya Al Kurun mere irde hiyen. Misin katen hiyen gobe epte ma gwahade yen nurde tagaltek. ²⁷ Irde Holi Spiritbe Al Kurunyen alya bereya faran yuren yen Al Kurunyen dufaymin po gama irde gusunjan irde hiyen. Ningeb nen alyen dufay kenkela kenen hiyen al Al Kurunbe Holi Spirit belen dufay dahade kerde gusunjan irde hi goyen kenkela nurde hiyen.

²⁸ Irdeb al kura Al Kurun belen dufaymin kerde hoy yirkeb yen ge amanen nurde unen han mar hitte mata forok yen han kurun gobe Al Kurun belen yad bul yirdeb mel goyen igin hen hen mat yirde hi gobe

nurde hite. ²⁹Gobe Al Kurun belen alya bereyamin hetek mar bikken nurd yunenbe Urmin yara henayin yen basina yiriyin geb, gogo dirde hi. Gogab Urmin gobe Al Kurunyen dirnen wen hitin mar gote urmin matalin hiyyen. ³⁰Al Kurunbe alya bereyamin bikken basina yirtin goyen hoy yiriyin. Irde hoy yirke watin mar goyen al huwak yiriyin. Irde al huwak yirtin mar goyen denem turnun yan yiriyin.

Al Kurunyen aman dufaybe kurun wor po

³¹Ningeb Al Kurun belen igin gwaha diryin goke daha yetek? Irde Al Kurun belen nen faran durde hi kenem ganun al belen asogo dirnayin? Hubu wor po! ³²Al Kurunbe Urmin yende wor po goyen urne yen be ma hirin. Gwaha titnenbe nen megen nin mar kurun gake nurde megen gar ten kerke katen kamyin. Ningeb Yesu Kristu basina irtek wor gogo dunyin geb, det hoyan dunen dunen nin kama hiyyen yen nurde han? Mon, kama ma hen kurun po dunen hiyen. ³³Al Kurun yingen po basina yirtin mar goyen al huwak yiriyin. Ningeb ganun al belen Al Kurun belen basina yirtin mar goyen merem yan yirnayin? Hubu wor po! ³⁴Be, Yesu Kristube nen ge ten kamyin. Irde kamyinde mat huwaryin. Huwardeb Doyan Al Kurun henbe Al Kurun hanin yase belen mat keperde nen ge ten Al Kurun gusunan irde hi. Ningeb ganun al belen merem yan dirde gote murungem bulun dunyen? Hubu wor po! ³⁵Irde ganun al belen Yesu Kristu belen bubulkuñne wor po yen nurd dunen hi bana gon mat dad sin diryen? Hubu wor po! Kanduk kurayen kurayen yenen hitek, ulninin misin katen hitek, al hoyan belen bulun bulun dirde hinayin, bing kamde hitek, ulninin umna minmon hitek, det bulun kura forok yen bulun dirtek hinayin, irde fuleña mata forok yen hinayin kurun gore Yesu Kristu belen nen gayen bubulkuñne wor po yen nurd dunen hi goyen igin walnayin? Epte mon! ³⁶Ningeb yen ge kanduk gwahade yentek goke Al Kurunyen asande gahade katin hi:

“Ge goke ten nenbe huginen al belen mudunke kamtek belnen po kun hityen.

Irde nenbe sipsip gasa yirke kamde hanen go gwahade goyen hityen,” yitin.

Tikin 44:22

³⁷Be, nenbe yitin gwahade po kanduk bana hityen gega, nen gayen bubulkuñne wor po yen nurd dunen hi al Yesu Kristu faran durke kanduk karkuwan gwahade goyen fole wor po yirde hityen. ³⁸Fuinde, Al Kurun belen nen ge amanen wor po nurd dunen hi. Ningeb dufaynerbe fuinde wor po gahade nurde hime: kamtek ma hitek yara kura, Al Kurunyen miyon wet ma ungura, han ka ma kame, irde det sanin minyan yara kura, ³⁹irde det nan kinde nin wet ma det megen binde nin wet ma det megen gar nin kurayen kurayen gore Doyan Al Kurunnin Yesu Kristu nin ten Al Kurun belen nen bubulkuñne wor po yen nurd dunen hiyen goyen epte ma wor po walnayin.

Israel mar

9 ¹Be, nebe Yesu Kristuya har geb, mere dinenj hime gabe fudinde dinenj hime. Usi ma wor po tenj hime. Bener fudinde yenj nurdeya dinenj hime. Holu Spirit wor merene gayen fudinde yenj nurde hi. ²Be, bene bindebe Israel mar ninj huginenj kanduknenj nurdeb buninenj wor po nurde himyen. ³Ningeb nigen minde ninj alya bereya goyen faranj yurmewonj wor po yenj nurde himyen. Goke tenjbe belej kura hi kenem mel gore nere gasunj tenj Yesu Kristu nurd unkeb nebe yende gasunj tenjbe Yesu Kristu tubul tenj gisaw kunjbe Al Kurunjen bearar bana henj yenj nurde himyen. ⁴Be, nigen minde ninj albe Israel mar gogo. Mel gobe Al Kurunj belej dirnenj wenj yirke tarenmij turunjen yanj goyen bana hinhan. Al Kurunjbe mel goya binja kura tarej po tenjbe Moseyen saba mananj yunyenj. Irde Al Kurunjen ya balem bana doloj ird ird mata yikala yiryinj. Irde mel goyen gwaha gwaha yirenj yenj binja hoyanj hoyanj mananj tenj hinhin. ⁵Mel gobe Yuda marte hakwaminj wor po minde mat watinj. Yesu Kristu wor yenj goyen minde mat watinj. Yesu Kristube Al Kurunj, det kurunjen gayen doyanj yirde hi al. Ningeb yenj po ga huginenj turunj irde hitek hi. Fudinde wor po.

⁶Be, Israel mar gobe tumnanj Yesuyen alya bereya Israel mar fudinde wor po hewonj gega, gwahade ma hanj. Ningeb Al Kurunj belej mel goyen hitte binja tiyyinj gobe sorkok hiriinj yenj nurtek? Monj, sorkok ma hiriinj. Israel marbe Al Kurunj belej basinja yiryinj gega, tumnanj ma basinja yiryinj. Al kura po basinja yiryinj geb, gogo al tumnanj ma Yesuyen alya bereya hitinj. ⁷Mel gobe tumnanj Abrahamyen minde mat watinj gega, go kurunjen gobe tumnanj Abrahamyen dirnenj wenj ma haminj. Gokeb bikkenj Al Kurunj belej, “Aisakyen minde mat forok yenj hinayinj go munj po gab diringe wenj henayinj,” inyenj gogo. ⁸Ningeb mere gote minjbe Abrahamyen dari po gama irde dirinj forok yitinj gobe Al Kurunjen dirnenj wenj monj. Munanj Al Kurunj belej Abraham hitte binja tiyyinj goyen gama irde dirinj forok yitinj go po ga Abrahamyen dirnenj wenj wor po. ⁹Be, Al Kurunj belej Abraham hitte binja tiyyinj mere gobe gahade: “Dama kura imoyenter nalu kirtinj hi goyenter gab sopte mulganj henj ge hitte wayenj. Goyenterbe berge Sarabe dirinj al dirinj kura kawanj kiryenj,” yitinj hi.

¹⁰Goyenbe go munj po monj. Aisak berem Rebeka urminj waranj gote nanijbe unjkurenj Aisak po. Aisak gobe nenj Israel mar kurunjen gate asinininj. ¹¹⁻¹²Goyenbe Aisak urminj waranj kalpanj goyen forok yenj minjmondebe Al Kurunj belej Rebeka goyen, “Itinje kulinde metenj al hiyyenj,” inyenj. Go mere gobe dirinj irawa go kawanj henj mata iginj daw ma bulunjen daw goyen tike yenenja ma gwaha yirinj. Al Kurunjen belej bikkenj dufayminj kiriyinj go po gama irde kulinj go basinja iriyinj. Ningeb Al Kurunjen belej gwaha iriyinj gobe yenjbe alyen mata kenenjbe basinja ma

yirde hiyen, dufayminde igiṅ nurd yunegbe basaṅa yirde hiyen goyen dikala dirde hi. ¹³Ningeb mata goke Al Kurunyen asande gahade katiṅ hi:

“Nebe Yekop goyen bubulkunṅe wor po yeṅ nurde uneg hime.

Munaṅ Isobe gwahade ma nurd uneg hime,” yitiṅ. *Malakai 1:2-3*

¹⁴Ningeb daha yetek? Al Kurun belen go tiyyiṅ goke teṅ yeṅbe mata huwak ma tiyyiṅ yetek? Epte moṅ! ¹⁵Al Kurun belen matamiṅ goke teṅ Mose gaha inyiṅ:

“Dufayner al kura buniṅeṅ ire yeṅbe gwaha po ireṅ.

Irde al kura igiṅ ire yeṅbe gwaha po ireṅ,” yitiṅ hi. *Yumulgaṅ 33:19*

¹⁶Ningeb Al Kurun yingey po gab ganuṅ al kura buniṅeṅ ire yeṅbe gwaha iryeṅ. Munaṅ al belen dufayminde Al Kurun belen basaṅa nirwoṅ yeṅ nuryeṅ, irde mata igiṅ teṅ himeke gab gwaha niryeṅ yeṅ kurut yeṅ hiyeṅ gore epte ma Al Kurun belen buniṅeṅ iryeṅ. ¹⁷Al Kurunbe matamiṅ gwahade geb, Isip naṅa doyaṅ al kurun Fero gobe meremiṅ pel ird ird niṅ basaṅa irdeb gaha inyiṅ: “Ge hittebe saṅiṅne turuṅ yaṅ wor po goyen kawan forok irmeke al megen hike kwa kurun gore nurdeb ne niṅ nurnayiṅ yeṅ dufay kerdeb gogo ge gayen doyaṅ al kurun girmiriṅ,” inyiṅ. ¹⁸Ningeb Al Kurunbe dufayminde al kura buniṅeṅ ire yeṅbe buniṅeṅ iryeṅ. Irde al kura meremiṅ pel ird ird niṅ tonaṅ tareṅ ire yeṅbe gwahade po iryeṅ.

¹⁹Be, Al Kurunbe gwahade hi goke al kura dufaymiṅ soṅ hekeb, “Al Kurun belen neṅ gayen mata gwaha gwaha teṅ hinayiṅ yeṅ yingende dufay po gama irde basaṅa dirtiṅ kenem daha mat dufaymiṅ waltek? Epte moṅ! Ningeb mata buluṅ teṅ hityen gobe nindikeṅ ma forok yirde hityen gega, daniṅ Al Kurun belen mata buluṅniniṅ ge merem yaṅ dirde hiyen? Gobe igiṅ moṅ,” yeṅ hanṅen. ²⁰Goyenpoga denṅbe al dahade geb, gwaha yeṅ haṅ? Neṅ al megen niṅ gare Al Kurun belen dufaymiṅ gama irde daha kura diryeṅ goyen goke epte ma, “Daniṅ gahade diranṅ?” intek. Mata gobe det kura al kura belen iryeṅ gore tigiri teṅbe iryeṅ al goyen, “Daniṅ gahade niranṅ?” ma inyeṅ go gwahade goyen. ²¹Be, kuwe yase yird yird albe woṅa teṅ kuwe yase gwahade yireṅ yeṅ nurdeb dufaymiṅ go po gama irde yiryen. Kuwe yase kura meten kurun uneg unenṅen ireṅ yeṅbe gwahade po iryeṅ. Munaṅ kuwe yase kura meten mali untek goyen ire yeṅbe igiṅ ala iryeṅ.

²²Ningeb Al Kurun wor mata gwahade goyen po teṅ hiyen. Yeṅbe mata buluṅ mar goyen beararmiṅ kawan po kennayiṅ, irde tareṅmiṅ wor keneṅ bebak tinayiṅ yeṅ nurde gwamuṅ yure yeṅbe igiṅ gwamuṅ yuryeṅ. Gega yeṅbe bemel ma gwaha yirde ulyande doyaṅ heṅ heṅ niṅ piṅeṅ ma irde hiyen. Gobe dufaymiṅ po gama irde gwaha teṅ hi geb, al kura belen goke epte ma innayiṅ. ²³Munaṅ al kura Al Kurunyen buniṅeṅ dufay bana po haṅ mar goyen kurabe neṅ gago. Neṅbe Al Kurunyen saṅiṅ turuṅ yaṅ wor po goyen kennayiṅ yeṅ bikkeṅ gitik diryiṅ geb,

tareŋmiŋ turŋuŋ yaŋ goyen neŋ gayen dikala direŋ yeŋ nurde hinhin. Goyenbe al kura beleŋ epte ma, “Daniŋ yeŋ po gwaha yirde hi?” innayinŋ. ²⁴Neŋbe Al Kurun beleŋ hoy diryiŋ gega, al miŋ unjkureŋde mat po ma hoy diryiŋ. Neŋ kurabe Yuda mar, kurabe al miŋ hoyan Yuda mar moŋ gayen hoy diryiŋ. ²⁵Al Kurun beleŋ gwaha diryiŋ goke mere basan almiŋ kura Hosea beleŋ Al Kurunyen mere gahade kayyiŋ:

“Ne beleŋ alya bereya nere ma hinhan goyen yadeb ‘Nere alya bereya,’ yineŋ.

Irde al miŋ hoyan goyen bubulkunne wor po yeŋ ma nurd yunen hinhem goyen yadebe ‘Diriŋne yago, bubulkunne wor po’ yineŋ.”
yitiŋ hi. *Hosea 2:23*

²⁶Irdeb,

“Naja kurar kura Al Kurun beleŋ, ‘Deŋbe nere alya bereya moŋ,’ yinyiŋde gor po kamebe,

‘Mel gabe Al Kurun gwahader hitiŋ gote alya bereya’ yinyeŋ,” yitiŋ hi. *Hosea 1:10*

²⁷Be, Al Kurunyen mere basan al Aisaia beleŋ Israel mar niŋ gahade tareŋ po tagalyiŋ:

“Israel marbe budam wor po, makaŋde niŋ sawsawa yara.

Goyenpoga Al Kurun beleŋ al tumŋan ma yawaryeŋ, al tapum muŋ po yawaryeŋ.

²⁸Gobe Doyan Al Kurun beleŋ alya bereya megen han kurun goyen hitte mere tiyyiŋ gote igineŋ aran po forok iryeŋ geb gogo,” yitiŋ hi. *Aisaia 10:22-23*

²⁹Mere gobe Aisaia beleŋ asaŋmiŋ bana goŋ meheŋ beleŋbe gahade kayyiŋ goya tuŋande. Meremiŋbe gahade:

“Doyan Al Kurun saŋiŋmiŋ kurun wor po beleŋ diriŋniniŋ kura yubul ma teŋ tumŋan gwamuŋ yuryiŋ manhan neŋbe Sodomya Gomoraya taunde niŋ mar yara hitewoŋ,” yitiŋ hi. *Aisaia 1:9*

Israel marbe Yesu niŋ dufaymiŋ tareŋ ma irde han

³⁰Niŋgeb goke teŋ neŋbe gaha po yetek: al miŋ hoyan Yuda mar moŋ, mata huwak teŋ teŋ niŋ dufay ma heŋ han mar beleŋ Yesu Kristu niŋ dufaymiŋ tareŋ irdeb Al Kurun diliŋde al huwak hitiŋ han. ³¹Munan Yuda marbe Moseyen sabare mata huwak niŋ yitiŋ goyen gama ird ird niŋ kurut yeŋ hanŋyen gega, Al Kurun diliŋde al huwak ma hitiŋ han. ³²Goyenbe Israel mar gobe dahade niŋ al huwak ma hitiŋ han? Mel gobe Yesu niŋ dufaymiŋ saŋiŋ irtiŋeŋbe mata igiŋ teŋ gab al huwak hetek yeŋ nurde hanŋyen geb, gogo soŋ hamiŋ. Gobe al kura hora go ma keneŋbe

kukuhuk urde takteŋ mayyeŋ go gwahade yara tiyamiŋ. ³³Goke teŋbe Al Kurunyen asaŋde gahade katiŋ hi:

“Ga kennaŋ.

Ne beleŋ Yerusalem taunde hora kura kereŋ.

Irkeb albe kukuhuk yurde yakteŋ gasa yiryen.

Irde hora kurun kura kereŋ.

Irkeb albe gore yirkeb yakteŋ gasa yirke kateŋ buluŋ po henayiŋ.

Gega al kura yeŋ ge dufaymiŋ tareŋ irnayiŋ marbe epte ma memya hetek hinayiŋ,” yitiŋ hi. *Aisaia 8:14; 28:16*

10 ¹Be, kadne yago, ne bener gabe Israel mar goyen Al Kurun beleŋ yumulgaŋ tiwoŋ yeŋ nurdeb Al Kurun gusuŋaŋ irde himyen.

²Mel gobe Al Kurun niŋ meteŋ titek wor po nurde haŋyen gobe fudinde yeŋ igiŋ tagaleŋ. Gega go teŋ haŋyen gobe Al Kurunbe gwahade yeŋ keŋkela ma bebak tenya gwaha teŋ haŋyen. ³Mel gobe Al Kurun diliŋde al huwak heŋ heŋ beleŋ gobe Al Kurun hitte mat watiŋ goyen ma nurdeb yingeŋde saŋiŋde al huwak hiniŋ yeŋ kurut yeŋ haŋyen. Niŋgeb al huwak heŋ heŋ beleŋ fudinde goyen gama ma irde haŋyen. ⁴Goyenbe al kura Yesu Kristu niŋ dufaymiŋ tareŋ iryeŋbe Al Kurun beleŋ al huwak inyeŋ. Niŋgeb goke teŋbe Yesu Kristu beleŋ Moseyen saba goyen pasi kiryiŋ.

⁵Be, Mosebe sabamiŋ gama irde al huwak heŋ heŋ goke gahade kayyiŋ: “Al kura sabamiŋ gama irde hiyeŋ albe saba gore po tareŋ irke hiyeŋ,” yitiŋ hi. ⁶Gega Yesu niŋ dufaymiŋ saŋiŋ irde Al Kurun diliŋde huwak hitiŋ marbe gaha yeŋ hinayiŋ: “(Yesu Kristube bikkeŋ meŋ gar katiŋ gega, go ma nurdeb Yesu teŋ meŋ gar kateŋ kateŋ niŋ yeŋ heŋbe) dindikeŋ uliŋ, ‘Ganuŋ beleŋ Al Kurunyen gasuŋde hurkuyeŋ?’ ma yenayiŋ. ⁷Irde (Yesu Kristube bikkeŋ kamiŋde mat huwariŋ gega, go ma nurdeb al kamtiŋ gasuŋde mat Yesu go teŋ waŋ waŋ ge yeŋ heŋbe) dindikeŋ uliŋ, ‘Ganuŋ al beleŋ al kamtiŋde gasuŋde kurkuyeŋ?’ ma yenayiŋ,” yitiŋ hi. ⁸Mere gote miŋbe gahade: “Al Kurun diliŋde huwak heŋ heŋ mere gobe gisaw inor ma hi. Ketaltiŋde hi, mohontiŋde hi, irde bitiŋ bana hi.” Mere gobe dufaytiŋ tareŋ ird ird mere, neŋ beleŋ tagalde tukuŋ hityen gogo. ⁹Niŋgeb mere go yitiŋ gwahade po, al kura biŋde mat wor po Al Kurun beleŋ Yesu go kamtiŋde mat isaŋ hiriŋ goyen fudinde yeŋ dufaymiŋ tareŋ iryeŋ, irde yingeŋ mohonde wor po, “Yesube Doyaŋ Al Kurun,” yiyyeŋbe Al Kurun beleŋ al go tumulgaŋ tiyyeŋ. ¹⁰Fudinde, al kura Yesu niŋ biŋde mat dufaymiŋ saŋiŋ irke Al Kurun beleŋ al huwak inyeŋ. Irde dufaymiŋ tareŋ irtiŋ goyen mohonde mat kawan po tagalkeb Al Kurun beleŋ tumulgaŋ tiyyeŋ. ¹¹Goke teŋbe Al Kurunyen asaŋdebe, “Al kura yeŋ ge dufaymiŋ tareŋ irtiŋ marbe epte ma yeŋ ge memya hetek hinayiŋ,” yitiŋ hi. ¹²⁻¹³Niŋgeb yitiŋ gwahade po, Yuda mar ma al miŋ hoyan Yuda mar moŋ goyen tumŋaŋ ala Al Kurun beleŋ gwaha yiryen. “Al kura gore Doyaŋ Al Kurun beleŋ faraŋ duri yeŋ hoy irnayiŋ marbe tumŋaŋ yumulgaŋ tiyyeŋ,”

yirin geb, yenbe al kura faran nin hoy irnaying mar tumnan gote Doyan Al Kurun hiyyen. Irde go mar goyen guram yirde sanin wor po yirde hiyen.

¹⁴Goyenbe al kura Doyan Al Kurun nin dufaymin taren ma iryenbe daha mat hoy iryen? Irde yende mere momonmin kura mun ma nurtin kenem daha mat yen ge dufaymin taren iryen? Irde yen ge al kura belen ma tagalkeb daha mat nuryen? Epte mon. ¹⁵Irde mere goyen tagal tagal nin hulan ma yirnayingbe ganun mar belen daha mat mere goyen tagalnaying? Hubu wor po. Goke tenbe gahade Al Kurunyen asande katin hi: “Al kura kun Al Kurunyen mere igin goyen tagalde hiyen al gobe Al Kurun belen igin wor po kinyen,” yitin.

¹⁶Goyenpoga Yuda marbe tumnan ma Yesu nin yitin mere igin goyen nurde dufaymin sanin iramin. Kura po ga gwaha tiyamin. Ningeb goke tenbe Aisaia belen, “Doyan Al Kurun, mere tagalde hiteke ganun al belen fudinde yen nurde dufaymin taren irnaying? Hubu wor po,” yirin. ¹⁷Ningeb al kura Yesu Kristu nin dufaymin taren ire yenbe meremin wa nurde gab dufaymin sanin iryen. Goyenbe mere igin goyen daha mat nuryen? Gobe al kura belen Yesu Kristuyen mere goyen tagalke gab nuryen. ¹⁸Goyenbe gusunan kura dire? Israel marbe mere igin goyen ma nuramin? Mon, nuramin. Ningeb goke tenbe Al Kurunyen asande gahade katin hi:

“Sabaminbe megen kurun gare nurde tukutin ala tiyyin.

Irde mereminbe nana kurun gayen kun pasi hirin,” yitin. *Tikin 19:4*

¹⁹Be, sopte gusunan kura dire? Israel mar gobe mere gote min bebak ma tiyamin? Mon, bebak tiyamin. Gega mere goyen harhok unamin. Ningeb goke Al Kurun belen yirin goyen bikken Mose belen gahade kayyin:

“Nebe alya bereya nere yitin mon goyen yawaren.

Irkeb go yenenbe bitinde igin ma nurnaying.

Irde merene bebak ma titin mar goyen yawaren.

Irkeb goke bitin ar yiyyen,” yitin hi.

Saba 32:21

²⁰Irde Aisaia belen Al Kurunyen mere tagal tagal nin kafura ma henbe Al Kurunyen mere goyen kawan po gaha yirin:

“Nebe al kura ne nin ma nankenen hitin mar belen nenamin.

Irde ne nin gususunan ma hen hitin mar hitte nigen kawan hemeke nenamin,” yitin hi.

Aisaia 65:1

²¹Goyenpoga Israel mar nin tenbe gaha yirin:

“Wampot mat wan wan wawun hihi gayen merene gama ma irde tonan sanin wor po hen han mar goyen

ne hitte wawon yen hanne yak irtinde hime,” yitin hi. *Aisaia 65:2*

Al Kurun belen Israel mar buningen yiriyin

11

¹Be, Israel marte matabe gwahade geb, Al Kurun belen alya bereyamin goyen pel yiriyin? Mon, gwaha ma yiriyin! Nigen wor

Israel mar al, irde Abrahamyen asem, irde Benyaminyen^d miŋde niŋ al. ²Fundinde, Al Kurunbe Israel mar goyen forok ma yekeya basiŋa yiryiŋ geb, alya bereyamiŋ go ma pel yiryiŋ. Be, deŋbe Al Kurunyen asaŋde Al Kurunyen mere basaŋ al Elaia beleŋ Israel mar niŋ igiŋ ma nurde Al kurun gusuŋaŋ iryiŋ gote baraŋmiŋbe bitiŋ sir ma yeŋ hiyen gogo. ³Be, Elaia beleŋ Al Kurun gaha inyiŋ: “Doyaŋ Al Kurun, mere basaŋ margebe gasa yirke kamaŋ. Irde ge galak girde hanŋyen altabe pir yirde pasi haŋ. Ne muŋ po gab gago hime gega, ne wor mununniŋ teŋ haŋ,” inyiŋ. ⁴Irkeb Al Kurun beleŋ dahade wol hiriŋ? Yeŋ beleŋ gahade wol hiriŋ: “Nebe nigeŋ ge Israel mar 7,000 basiŋa yirmiriŋ haŋ. Niŋgeb mel gobe det tonen kura Bal ineŋ hanŋyen goyen ma doloŋ irde haŋ,” inyiŋ. ⁵Niŋgeb gayenter gayen wor Israel mar bana al kura Al Kurun beleŋ buniŋen yirde igiŋ igiŋ yirde basiŋa yirtiŋ mar kura haŋ. ⁶Mel gobe Al Kurun beleŋ buniŋen yirde igiŋ igiŋ yirtiŋ geb, basiŋa yiryiŋ. Mel gote mata igiŋ goke ma basiŋa yiryiŋ. Munan matamiŋ igiŋ goke Al Kurun beleŋ buniŋen yirde igiŋ igiŋ yiryiŋ manhan yeŋ beleŋ buniŋen yirde igiŋ igiŋ yiryiŋ gobe miŋ miŋmoŋ hewoŋ.

⁷Niŋgeb Israel mar niŋ daha yetek? Mel gobe Al Kurun diliŋde al huwak heŋ heŋ ge kurut wor po yeŋ hinhan. Goyenpoga gwahade ma hamiŋ. Alya bereya Al Kurun beleŋ yumulgaŋ tiye yeŋ basiŋa yirtiŋ mar gore muŋ po gab Al Kurun diliŋde al huwak hamiŋ. Munan budam kurun gobe biŋ tareŋ wor po irde Al Kurunyen mere pel iramiŋ. ⁸Matamiŋ gwahade goke Al Kurunyen asaŋde gahade katiŋ hi:

“Al Kurun beleŋ mel gote dufaymiŋ mala tiyyiŋ.

Irkeb gayenter diliŋde Al Kurunyen mere keneŋ haŋ gega, bebak ma teŋ haŋ.

Irde kirminiŋde Al Kurunyen mere nurde haŋ gega, wukkek ma nurde haŋ,” yitiŋ hi.

Saba 29:4; Aisaia 29:10

⁹Irde Dewit beleŋ gaha yiriŋ:

“Dula matamiŋ gore po yukun buluŋde yukukeb buluŋ hewoŋ.

Irdeb yakten gasa yirwoŋ.

Mata buluŋmiŋ gote muruŋgembe gogo teŋ hinayiŋ.

¹⁰Go mar goyen diliŋ titmiŋ heŋbe epte ma nanŋkenwoŋ.

Irde hugiŋen kanduk kurun bana heŋ pukiŋ werwer po heŋ hiwoŋ,”

yitiŋ hi.

Tikiŋ 69:22-23

¹¹Be, Israel mar gwahade haŋ goke gusuŋaŋ kura direŋ. Israel mar yakten gasa yiryen yitiŋ goyenbe fundinde gwaha yirke hugiŋen buluŋ po heŋbe sopte igiŋ hetek ma henayiŋ? Moŋ! Israel mar gote mata buluŋ niŋ teŋbe Al Kurun beleŋ al miŋ hoyan Yuda mar moŋ goyen yumulgaŋ

^d 11:1 Benyaminbe Yekop urmiŋ weŋ 12 bana goŋ funaŋbe gogo.

tiyyin. Gogab Israel mar belen go yenenbe, “Danim geb nenbe gwahade ma hite?” yen bin huwarwon yen nurdeb gogo Al Kurun belen gwaha yiriyin. ¹²Be, Israel mar belen mata bulun tiyamin goke ten Al Kurun belen al min hoyan megen han kurun goyen igin igin wor po yiriyin. Irde Israel mar belen Al Kurunyen mere gama ird ird nin son hamin goke tenbe al min hoyan Yuda mar mon goyen igin igin wor po yiriyin. Ningeb Israel mar tumnan Al Kurun hitte mulgan henayinbe Al Kurun belen daha tiyyen? Yenbe amanen wor po nurdeb al igin igin yiryen gobe kurun wor po, hanpaya igin igin yiriyin gote folek wor po yiryen!

¹³Be, den al min hoyan Yuda mar mon goyen mere kura diren tihim. Nebe Al Kurun belen al min hoyan Yuda mar mon hitte kun merene tagalde hayin ninenbe meten go nuntin geb, metenne goke turun turun titek hime. ¹⁴Gwaha ten himekeb nigen al Israel mar goyen nenenbe, “Danim nenbe gwahade ma hite?” yen bin huwarke mel goyen kura Yesu nurd unkeb Al Kurun belen yumulgan tiwon yen nurde gwaha ten himyen. ¹⁵Israel mar belen Al Kurunyen mere pel iramin geb, Al Kurun belen mel go harhok yunenbe al min hoyan Yuda mar mon goyen awalik yiriyin. Gega Israel mar gore Al Kurun nin bin mulgan hekeb Al Kurun belen yumulgan ten daha yiryen? Igin wor po yiryen. Go tinayin gobe al kamtinde mat huwartin yara tinayin. ¹⁶Mata gwahade forok yiyyen gobe beret kura Al Kurun unnin yen kanbe ubala ten parwek dirnen mun kura Al Kurun galak irnayin gobe beret kurun goyen wor tumnan Al Kurunyen hiyyen go gwahade goyen. Irde he kura goyen filginiybe Al Kurun belen wukkek iryenbe he gote haniya piginya kurun goyen wor wukkek henayin go gwahade goyen.

¹⁷Be, olip he yase gote haniy kura walde yemeydeb olip he duwi kurate haniy tenbe waltinde gore tur irke he duwi gote haniybe he yase gote haniy hiri. Irde olip yase filginiy belen fe tulun ten hi goyen olip duwi haniy gor tur irtin goyen wor fimin goyen tulun ten gergen hiri. Be, olip duwi haniy gobe den al min hoyan Yuda mar mon gogo. Munan olip yase haniy gobe Israel mar. Ningeb Israel mar Al Kurun harhok unamin gote gasunbe den belen tamin. ¹⁸Ningeb dindiken ge turun turun ten he yase gote haniy waltin Israel mar goyen det dirnen yen ma nurde yunen hinayin. Denbe dulin po tur dirtin han. Den belen olip yase gote filginiy^e goyen tarey ma irde han. Gwahade yarabe filginiy gore gab den goyen sanjin dirde hi. ¹⁹Goyenpoga den belen huwardeb, “Gwaha, goyenbe olip yase gote haniy Israel marbe ban yen kattin yara geb, nen gare gasunmin titin go,” yen han. ²⁰Be, gobe fudinde gega, mel gobe Yesu nin dufaymin tarey ma yirkeb gogo walde yimiyyin. Munan denbe yen ge dufaytin tarey irtinde matbe gogo gasunmin tamin. Den wor Al Kurun belen Israel

^e 11:18 Olip yase filginiybe Israel marte hakwamin Abraham, Aisakyabe Yekopya nin yitin.

mar pel yiriyiŋ gwahade goyen diryeŋ geb, dindikeŋ ge turuŋ turuŋ ma teŋ kafura heŋ ga hinayiŋ. ²¹ Al Kuruŋ beleŋ he yase gote haniŋ wor po goyen yeŋ ge dufaymiŋ saŋiŋ ma yirkebe walde yimiyyiŋ. Niŋgeb deŋ olipe duwi haniŋ duliŋ dawaŋ gor tur dirtiŋ goyen Al Kuruŋ niŋ dufaytiŋ tareŋ ma yirnaŋiŋbe walde demey demeymiŋbe meteneŋ moŋ geb, dindigeŋ ge turuŋ turuŋ ma teŋ kafura heŋ ga hinayiŋ.

²² Niŋgeb Al Kuruŋbe igiŋ igiŋ po ma diryeŋ, buluŋ dirtek goke manan nurde ga hinayiŋ. Yeŋbe al kura meremiŋ gama ma irde hinayiŋ marbe buluŋ yiryen. Munan deŋ yeŋ ge dufaytiŋ tareŋ irtiŋ marbe igiŋ igiŋ diryeŋ. Munan gwahade ma tinayiŋbe deŋ wor walde dimiyyeŋ. ²³ Be, Israel mar Al Kuruŋ beleŋ bikkeŋ walde yimiyyiŋ goyen yeŋ ge dufaymiŋ saŋiŋ ma yird yird mata goyen tubul tinayiŋbe Al Kuruŋ beleŋ yadebe olipe hemiŋde sopte tur yiryen. Al Kuruŋbe gwaha yird yird tareŋ miŋyaŋ geb, igiŋ gwaha yiryen. ²⁴ Deŋbe olipe duwi haniŋ yara gega, Al Kuruŋ beleŋ olipe yasere gor tur dirkebe he gote haniŋde gereŋ hamiŋ. Niŋgeb Israel mar olipe yase gote haniŋ wor po goyen gasuŋeŋde sopte tur ird irdbe meteneŋ moŋ wor po. Araŋeŋ po tur iryen.

Al Kuruŋbe al tumŋaŋ buniŋeŋ yirde hiyen

²⁵ Be, kadne yago, mere kura banare niŋ goyen deŋbe keŋkela bebaŋ tiwoŋ yeŋ nurde hime. Gogab dufaytiŋ wukkek yeŋ dindikeŋ ge turuŋ turuŋ ma teŋ hinayiŋ. Be, merebe gahade: Israel mar beleŋ biŋ tareŋ irde Al Kuruŋyeŋ mere pel irde haŋ gobe hugiŋeŋ ge moŋ. Go teŋ haŋ gobe al miŋ hoyan Yuda mar moŋ goyen Al Kuruŋ beleŋ dufaymiŋde gwahade wanayiŋ yeŋ nuriŋ goyen waŋ ep heke gab bada heŋ Al Kuruŋ niŋ biŋ mulgaŋ henayiŋ. ²⁶ Irkebe Al Kuruŋ beleŋ Israel mar goyen tumŋaŋ yumulgaŋ tiyyeŋ. Niŋgeb goke teŋbe Al Kuruŋyeŋ asaŋde gahade katiŋ hi:

“Yumulgaŋ teŋ teŋ Albe Yerusalem^f mat forok yiyyeŋ.

Yeŋ beleŋ Yekopyen miŋde niŋ marte mata buluŋ goyen yad siŋa yiryen.

²⁷ Goya goyenbe mata buluŋmiŋ halde yuneŋ. Gabe mel go hitte biŋa timiriŋ go goyen,” yitiŋ hi. *Aisaia 59:20-21; 27:9*

²⁸ Be, gayenter gayen Israel mar gobe Yesu niŋ yitiŋ mere igiŋ goyen pel irde haŋ geb, mere igiŋ gobe deŋ al miŋ hoyan Yuda mar moŋ hitte kukebe gogo nurde haŋ. Mata gobe deŋ ge teŋ forok yitiŋ geb, gogo Israel mar gore Al Kuruŋ asogo irde haŋ. Gega Israel marbe asem weŋ Abraham, Aisakyabe Yekopya goke teŋbe Al Kuruŋ beleŋ basiŋa yiriyiŋ geb, gayenter wor Israel mar goyen bubulkuŋne wor po yeŋ nurd yuneŋ hi. ²⁹ Al Kuruŋbe alya bereya nigen yeŋ basiŋa yirde guram yirde saŋiŋ

^f 11:26 Kurabe Saion.

yiryenbe go ma sopte tareŋmin tumulgaŋ tiyyen geb, gogo Israel mar niŋ amaŋen nurde hiyen. ³⁰Munaŋ deŋ al miŋ hoyan Yuda mar moŋbe biken Al Kurunyen mere gama ma irde hinhan gega, Israel mar gore meremiŋ gama ma irkeb gayenter Al Kurunyen buninen dufaybe deŋ hitte hi. ³¹Ningeb Israel mar Al Kurunyen mere gama ma irde haŋ goyen wor Al Kurunbe deŋ Yuda mar moŋ goyen buninen diriyiŋ gwahade goyen po yiryen. ³²Al Kurun beleŋ alya bereya buninen yirde igiŋ igiŋ ma yiryenbe epte ma mata buluŋ bana mat siŋare katnayiŋ goyen yikala yiren yenbe nurtiŋde po alya bereya tumŋaŋ yubul tike meremiŋ pel irtiŋde po hinhan.

³³Fudinde, Al Kurunyen buninen dufayya dufay wukkekminiŋyabe kurun wor po. Yenbe det kuraŋ ma wor po amu heŋ hiyen. Ningeb ganuŋ al beleŋ dufay kerde hiyen goyen gwahade gwahade yeŋ tagalnayiŋ? Irde ganuŋ al beleŋ matamiŋbe gwahade yeŋ bebak tinayiŋ? Hubu wor po!

³⁴Ningeb goke teŋbe Al Kurunyen asaŋde gahade katiŋ hi:

“Ganuŋ beleŋ Doyaŋ Al Kurunyen dufay keneŋ bebak tiyyen? Epte moŋ.

Ganuŋ beleŋ dufay igiŋ kura unyen? Epte moŋ,” yitiŋ hi. *Aisaia 40:13*

³⁵Irde,

“Ganuŋ beleŋ Al Kurun det kura untiŋ geb, gote wolminiŋ untek hi? Hubu wor po,” yitiŋ hi. *Yop 41:11*

³⁶Fudinde, det kurun gabe Al Kurun hitte mat po watiŋ, irde yeŋ beleŋ po yiryiŋ. Irde det kurun gabe yeŋ beleŋ po gab pasi kiryen. Ningeb yeŋ po ga huginen denem turuŋ yaŋ irde hitek! Fudinde wor po.

Yesuyen alya bereyat mata gergen

12 ¹Ningeb, kadne yago, Al Kurun beleŋ neŋ gayen buninen wor po dirde hiyen geb, mere tareŋ po direŋ tihim: megen heŋya dindiken goyen det kura Al Kurun galak irtiŋ yara Al Kurun unnayiŋ. Gwaha irniŋ yenbe dindiken goyen Al Kurun diliŋde wukkek, yeŋ beleŋ amaŋen nurtek mat po mata teŋ hinayiŋ. Mata gwaha teŋ hinayiŋ gobe Holi Spirityen saŋiŋde Al Kurun doloŋ ird ird matabe gogo teŋ hinayiŋ. ²Irde megen niŋ marte mata go ma gama irde hinayiŋ. Gwaha titŋenbe dufaytiŋ gergen igiŋ po yirde matatiŋ hoyan teŋ hinayiŋ. Gwaha irde gab Al Kurunyen dufay goyen keneŋ bebak teŋ hinayiŋ. Al Kurunyen dufayde det damiŋbe igiŋ, mata dahadebe Al Kurun beleŋ amaŋen nurde hiyen, irde mata damiŋbe Al Kurun diliŋde buluŋ miŋmoŋ goyen yeneŋ kenkela bebak teŋ hinayiŋ.

³Be, Al Kurun beleŋ buninen nirde igiŋ igiŋ nirde metenmiŋ nuntiŋ geb, deŋ haŋ kurun goyen mere kura direŋ tihim. Merebe gahade: deŋ bana goyen al kura yingenbe al gwahade moŋ gega, nebe al gwahade

yeŋ yingen ge turuŋ turuŋ ma teŋ hiyeŋ. Gwaha titiŋe Al Kuruŋ niŋ dufaytiŋ tareŋ ird ird goyen bitiŋ bana kirtiŋ gobe dahade, kuruŋ ma diriŋe goyen keŋkela dufay heŋ bebak teŋ gab deŋ duŋkureŋ duŋkureŋbe dahade haŋ goyen nurde hinayiŋ. ⁴Gobe neŋ kuruŋ gabe ulniniŋ pigiŋ manaŋ, irde ulniniŋdebe det kurayen kurayen goyen gor haŋ geb, gago dinen hime. Be, det gobe meten uŋkureŋ po ma teŋ haŋ, hoyan hoyan teŋ haŋ. ⁵Niŋgeb gwahade goyen po, neŋbe budam wor po gega, Yesu Kristuya heŋbe Yesuyen uliŋ pigiŋ po hitiŋ hite. Irde neŋ duŋkureŋ duŋkureŋbe Yesuyen alya bereya hoyan hoyan goyen faran yurd yurd niŋ hite. ⁶Goke teŋbe neŋ kuruŋ gabe Al Kuruŋ beleŋ buniŋe dirde igiŋ igiŋ dirdeb Holi Spirityen tareŋ forok ird ird mata kurayen kurayen goyen nende gigen duntiŋ hite. Gwahade duntiŋ gobe Al Kuruŋ beleŋ neŋ duŋkureŋ duŋkureŋ damiŋ duneŋ yeŋ dufaymiŋ kirtiŋ goyen po gama irde duneŋ hiyeŋ. Niŋgeb al kura Al Kuruyen mere basan heŋ tagal tagal mata miŋyan kenem Al Kuruŋ niŋ hekkeŋ nurde hitiŋ gobe kuruŋ ma diriŋe goyen keneŋ bebak teŋ gab metenbe goyen tuŋande po meten teŋ hiyeŋ. ⁷Al kura al hoyan faran yurd yurd saŋiŋ titiŋ kenem go tareŋ titiŋ goyen gama irde al faran yurde hiyeŋ. Munan al saba yird yird tareŋ titiŋ kenem yeŋ wor gwahade po, saba yirde hiyeŋ. ⁸Be, al kura al hoyan kanduk yenke saŋiŋ yird yird tareŋ titiŋ kenem gwahade po teŋ hiyeŋ. Munan al kura al hoyan det yuneŋ yuneŋ tareŋ titiŋ kenem wilakneŋ nurdeya det al yuneŋ hiyeŋ. Irde al kura doyan al heŋ heŋ tareŋ titiŋ kenem al gobe yul ma yeŋbe al hoyan keŋkela doyan yirde hiyeŋ. Irde al kura al hoyan buniŋe yird yird saŋiŋ titiŋ kenem al gobe aman dufay hende gwaha teŋ hiyeŋ.

Kadtiŋ ge amanen nurd yuneŋ hinayiŋ

⁹Be, deŋbe al hoyan niŋ amanen nurd yuneŋyabe bitiŋde mat fudinde wor po gwaha teŋ hinayiŋ. Irde mata buluŋbe harhoktiŋ yuneŋ, mata igiŋbe tareŋ po yanarde hinayiŋ. ¹⁰Kadtiŋya kadam amanen nurd gunen teŋ eke merere po hinayiŋ. Irde dindiken turuŋ yirtiŋeŋbe kadtiŋ yago wa turuŋ yirde hinayiŋ. ¹¹Be, Al Kuruyen meten teŋ teŋ niŋ piŋeŋ ma heŋ hinayiŋ. Tareŋ po heŋbe bitiŋ bana mat wor po Al Kuruyen meten teŋ hinayiŋ. ¹²Irde Al Kuruŋ beleŋ igiŋ diriŋe yeŋ goke doyan heŋya amanen po nurde hinayiŋ. Kanduk bana heŋyabe Al Kuruŋ beleŋ kanduk go pasi iryeŋ yeŋ doyan heŋ heŋ niŋ piŋeŋ ma heŋ hinayiŋ. Irde hugiŋe Al Kuruŋ mere irde hinayiŋ. ¹³Be, Al Kuruyen alya bereya kura det kuran amu heŋ hike yeneŋbe dettiŋ kura yuneŋ hinayiŋ. Irde al hoyan yatiŋde wakeb gargar yirde hinayiŋ.

¹⁴Be, al kura buluŋ buluŋ dirde hinayiŋ mar goyen Al Kuruyen tareŋde guram yirde saŋiŋ yirde hinayiŋ. Sopte dinen hime. Al goyen guram yirde tareŋ yirde hinayiŋ, karan ma yurde hinayiŋ. ¹⁵Irde alya

bereya amañen nurde hikeb den wor yen nurnayin gwahade goyen po amañen nurde hinayin. Irde alya bereya esen hikeb den wor yen nurnayin gwahade goyen po nurde esen hinayin. ¹⁶Dindiken ulinbe awalikde hinayin. Irde dindiken ge turun turun ma tenbe al mali den gem mon mar goya awalik hen hen nin amañen nurde hinayin. Irde, “Nenbe dufay wukken epte hite,” yen ma nurde hinayin.

¹⁷Be, al kura beken bulun bulun dirkeb wol hihim yen bulun ma irde hinayin. Al tumnan dilingde mata igin po ten ten nin kenkela hen ga hinayin. ¹⁸Irde bitin kamke al hoyanya tumnan awalikde hen hen belhen kura hike kenem gwahade hen hen ge kurut wor po yen hinayin. ¹⁹Kadne yago, al kura beken bulun dirkeb wol ma hen hinayin. Gwaha titnenbe Al Kurun haniinde kerde hinayin. Irkeb yen beken gab al goke bearar ten murungem bulun unyen. Al Kurunyen asande Doyan Al Kurun beken, “Bulun diran mar goyen wol hen hen gobe nere meten. Ne beken gab matamin gote murungem yunen,” yirin geb, gago dinen hime. ²⁰Ningeb Al Kurun beken, “Asogoge kura benge kamke yenenbe benge yunen hayin. Fe nin yirkeb fe yunen hayin. Gwaha ten hayin goyen genenbe mel gobe memya nin yumu henayin. Gobe kak kulum bok yen hitin yade al go tonan hende yerayin go gwahade goyen,” yitin geb, wol ma hen mata igin gwahade po ten hinayin. ²¹Mata bulun beken fole dirtek ma hinayin. Gwahade hitnenbe mata igin po ten hinayin. Irkeb goreb mata bulun fole irde hien.

Doyan mar karkuwan palap yirde hinayin

13 ¹Be, gabmanbe Al Kurun beken kerdeb alya bereya doyan yird yird sanin untin geb, den kurun gobe doyan martinde yufukde hen meremin gama irde hinayin. ²Munan doyan marte mere pel irde han mar gobe yen goyen po ma asogo yirde han. Gobe Al Kurun, gabman goyen kerde taren untin al goyen asogo irde han. Ningeb gwaha ten han marbe yingen kanduk yawarnayin. ³Doyan marbe mata igin ten han mar goyen bulun yirtek ma nurdeb mata bulun ten han mar go po gab bulun yird yird nin nurde han yen geb, gogo doyan marte mere nurde hinayin dinen hime. Denbe doyan martin beken bulun dird dird nin kafura hen han kenem mata huwak po ten hinayin. Irkeb turun dirde hinayin. ⁴Mel gobe keperd keperdtin igin ird ird nin Al Kurun beken meten yuntin geb, gogo mata huwak ten hikeb turun dirde hinayin. Gega doyan mar gobe mata bulun gote murungem dunen dunen taren minyan geb, mata bulun tinayinbe mel goke kafura henayin. Mel gobe Al Kurun beken mata bulun ten han mar goyen beararin yikala yird yird meten yuntin geb, mata bulun mar goyen murungem bulun yunen han yen. ⁵Ningeb goke tenbe doyan martinde mere gama irde hinayin. Go ten hinayin gobe doyan martin beken bulun dird dird nin kafura henya po ga ma ten hinayin.

Mata igiŋ teŋ teŋ dufay gama ird ird niŋ bitiŋde wukken wor po nurdeya ga teŋ hinayiŋ.

⁶Ningeb goke teŋbe teks wor yerde hinayiŋ. Doyaŋ marbe alya bereya doyaŋ yird yird meten yuntin geb, teks go yadebe gore po alya bereya faraŋ yurde haŋyen. ⁷Ningeb deŋ tumŋaŋ da kura gabman haniŋde kertek gobe kerde hinayiŋ. Teks kurayen kurayen yertek haŋ kenem yerde hinayiŋ. Munan kafura yirtek marbe kafura yirde hinayiŋ. Irde palap yirtek yenenbe palap yirde hinayiŋ.

Kadtiŋ ge amaŋen nurde yunen hinayiŋ

⁸Be, al kura hitte kuŋ det kura niŋ gusuŋaŋ irde yawartin kenem araŋen po wol heŋ hinayiŋ. Irkeb gog po hubu hiyyen. Goyenpoga wol heke hubu ma hetek det kurabe kadtiŋ ge amaŋen nurd yunen yunen mata gogo geb, hugiŋen gwahade po teŋ hinayiŋ. Al kura kadom ge amaŋen nurde unen hi al gobe Moseyen saba kurun gote miŋ goyen gama irde pasi irde hiyen geb, gogo kadtiŋ ge amaŋen nurde yunen hinayiŋ dinen hime. ⁹Moseyen sabarebe, “Al berem yaŋ beleŋ bere hoyan ma duwan irde hiyen. Bere wor gwahade po teŋ hinayiŋ. Irde al ma gasa yirke kamde hinayiŋ, kawe ma teŋ hinayiŋ, kadtiŋ igiŋ hike kenenbe daniŋ nebe gwahade moŋ yeŋ ma nurde hinayiŋ,” yitiŋ. Irde saba go banabe mere saŋiŋ hoyan manan haŋ. Goyenbe saba bana mere tareŋ haŋ kurun gote miŋ wor pobe mere unkuŋen gago po: “Gigen ge amaŋen nurde hayen gwahade goyen po, al hoyan niŋ manan gwahade po nurde yunen hayiŋ,” yitiŋ go goyen. ¹⁰Al kura kadom ge amaŋen nurd yunen hiyen al gobe epte ma kadom bulun yiryen. Goke teŋbe al kura kadom ge amaŋen nurd unyen al gobe Moseyen saba kurun goyen gama ird pasi hiyyen yihim gago.

Nalu funanbe binde heŋ hi

¹¹Be, deŋ gayenterbe da nalure haŋ goyen nurde haŋ geb, gago mata igiŋ gwahade teŋ hinayiŋ dinhem. Haŋkapy deŋ beleŋ Yesu Kristu niŋ dufaytin tareŋ iramiŋ goyenter mat waŋ waŋ gayenterbe yeŋ beleŋ dumulgaŋ tiyyen nalu funan goyen binde wor po heŋ hi. Ningeb dufaytinde firtiŋ yara haŋ goyen bitiŋ bak yetek nalu gobe bikken binde hihi geb, huwarnan. ¹²Mata bulun gobe wawun kidoma yara goyen hubu hewen tiya. Irkeb naŋa fay urde wuk yewen tiya geb, kidoma bana niŋ mata bulun gobe yubul po teŋbe Al Kurunyen mata hulsi yara goyen tanarde hinayiŋ. Gobe fulenare niŋ amil ain beleŋ po irtiŋ goyen hor titiŋ yara teŋ hinayiŋ. ¹³Ningeb farende haŋ marte mata igiŋ po teŋ hinayiŋ. Irde dula mata po teŋ teŋ mata, fe nene kukuwa heŋ heŋ mata, leplep mata, kari bulun bulun teŋ teŋ mata, irde ard ard matayabe kadom igiŋ mat hike goke biŋ ar yeŋ yeŋ mataya goyen ma po teŋ hinayiŋ.

¹⁴Gwaha titjenbe Doyan Al Kurun Yesu Kristuya heŋ yeŋ beleŋ mata iŋiŋ teŋ hiyen gwahade po teŋ hinayiŋ. Irde megen niŋ dufay bulun go gama irde ulŋiŋde aman heŋ heŋ niŋ ma nurde hinayiŋ.

Kadtiŋde mata niŋ mali ma tagalde hinayiŋ

14 ¹Be, deŋ haŋ bana goyen al kura dufaymiŋ Al Kurun niŋ saŋiŋ irtiŋ goyen tareŋ wor po ma hike yeneŋbe goke ma nurde awalik yirde hinayiŋ. Irde dufaymiŋ kura goke mel goya kadam mohonŋde ma teŋ hinayiŋ. ²Al kurabe Al Kurun niŋ dufaymiŋ tareŋ irtiŋ goyen kurun geb, det kurun gabe iŋiŋ ala netek yeŋ nurde haŋyen. Goyenpoga al kurabe Al Kurun niŋ dufaymiŋ saŋiŋ irtiŋ goyen hako po haŋ geb, paŋiŋ po gab iŋiŋ nen hitek yeŋ haŋyen. ³Niŋgeb al kura det kurun gabe iŋiŋ nene hitek yeŋ hinayiŋ mar beleŋ paŋiŋ po nene hinayiŋ mar goyen, “Dufaytiŋbe tareŋ moŋ,” yeŋ yeneŋ tagal yuneŋbe al goyen go ma yenhet yenhet ma yirde hinayiŋ. Irde paŋiŋ po nene hinayiŋ mar beleŋ det kurun gayen iŋiŋ ala nene hinayiŋ mar goyen, “Deŋbe bulun teŋ haŋ,” yineŋ merer ma yirde hinayiŋ. Mel gobe tumŋaŋ Al Kurun beleŋ bikkeŋ iŋiŋ ala yintiŋ haŋ geb, gago dineŋ hime. ⁴Deŋbe al ganuŋyen tareŋde al hoyanŋde meten mar tagal yuneŋ haŋ? Mata gobe bulun wor po! Niŋgeb meten mar gobe Doyan Almiŋ beleŋ gab mel gote mata yeneŋbe iŋiŋ ma bulun yinyeŋ. Doyan Al Kurunbe mel go iŋiŋ saŋiŋ yiryen geb, tareŋ po huwarnayiŋ.

⁵Gwahade goyen po, al kurabe nalu kura po gab nalu keŋkelak, Al Kurunyen nalu yeŋ nurde haŋyen. Goyenbe al kurabe nalu tumŋaŋ iŋiŋ ala tuŋande po yeŋ nurde haŋyen. Goyenbe goyen goke kadam mohonŋde ma teŋ hinayiŋ. Nalu kuraŋ dahade kura nurde hinayiŋ gobe yingeŋ biŋde po hiyeŋ. ⁶Fuŋinde, nalu kura po gab nalu keŋkelak Al Kurunyen nalu yeŋ nurde haŋyen marbe Doyan Al Kurun turun ird ird niŋ gwaha teŋ haŋyen. Irde al kura det kurun gab iŋiŋ netek ala yeŋ haŋyen mar wor biŋge goke Al Kurun iŋiŋ nurd uneŋ gab nene haŋyen geb, go mata gore Al Kurun turun irde haŋyen. Irde al kura det kura kutŋa irde haŋyen marbe go teŋ haŋyen goreb Al Kurun turun irde det kutŋa irtiŋ goke Al Kurun iŋiŋ nurd uneŋ haŋyen. ⁷Neŋ kurun gayen hitek ma kamtek wet kurun gobe nindikeŋ ge ma hitek, Doyan Al Kurun niŋ teŋ hitek geb, gogo teŋ hityen. ⁸Niŋgeb dilniniŋ gergeŋ hitek gabe Doyan Al Kurun niŋ po teŋbe hitek. Irde kamtek wor yeŋ ge po teŋ kamtek. Niŋgeb dilniniŋ gergeŋ hitek wet ma kamtek wet kurun goyen tumŋaŋ neŋbe Al Kurunyen alya bereya po geb.

⁹Be, goyen goke teŋbe al kamtiŋya diliŋ gergeŋ haŋya kurun gote Doyan Al Kurun heweŋ yeŋbe Yesu Kristu gogo megen gar kateŋ kamde sopte huwariŋ. ¹⁰Niŋgeb deŋbe daniŋ geb kadtiŋde mata yeneŋ goke merer yirde haŋ? Irde daniŋ geb kadtiŋ goyen al tareŋ miŋmoŋ yeŋ

yenen tagal yunenbe al goyen ma yenhet yenhet yirde han? Neŋbe tumŋaŋ Al Kurun diliŋde merere huwartek geb, gwaha ma teŋ hinayiŋ. ¹¹Neŋ tumŋaŋ Al Kurun diliŋde merere huwartek goke Al Kurunyen asanŋde gahade katiŋ hi:

“Doyaŋ Al Kurunbe gaha yeŋ hi:

‘Fudinde wor po nebe gwahader himyen.

Megen niŋ mar tumŋaŋ ne hitte waŋ dokolhon yugulun tinayiŋ.

Alya bereya tumŋaŋ, “Gebe Al Kurun,” ninnayiŋ,’ ” yitiŋ hi.

Aisaia 45:23

¹²Goke teŋbe yitiŋ gwahade po, neŋ kurun gabe nende gigen mataniniŋ Al Kurun momoŋ irniŋ.

¹³Niŋgeb, kadininiŋde mata yenen goke ma tagalde hitek yeŋ dufay saŋiŋ po kertek. Irdeb mata gwaha titeke al kadtiŋ dufaymiŋ bulun heke mata bulunŋde katnak yeŋbe mata gwahade ma titek yeŋ dufay tareŋ po kerde ga mata teŋ hinayiŋ. ¹⁴Nebe Doyaŋ Al Kurun Yesuya har geb, dufaynerbe det kurun gayenbe tumŋaŋ Al Kurun diliŋde tikiŋ miŋmoŋ yeŋ nurde hime. Goyenpoga al kura beleŋ det kurabe Al Kurun diliŋde tikiŋ miŋyaŋ yeŋ nurde han kenem yeŋ hitte po ga det gobe tikiŋ miŋyaŋ hiyyeŋ. ¹⁵Niŋgeb deŋ beleŋ biŋge kurun gabe Al Kurun diliŋde igiŋ ala po yeŋ nurde nene hinayiŋ. Gega kadtiŋ kura gwahade ma nurde hiyen gore denenbe biŋde kandukŋeŋ nurde hiyenbe mata gobe kadtiŋ ge amanen nurd yunen yunen mata goyen gama ma irdeb gogo teŋ hinayiŋ. Niŋgeb biŋge kura nenayiŋ goke teŋbe kadtiŋ kura Yesu Kristu yeŋ ge teŋ kamyiŋ gote dufaymiŋ bulun ma irnayeŋ. ¹⁶Irde dufaytiŋde mata kurabe igiŋ yeŋ nurde hinayiŋ gega, al kura mata gobe igiŋ moŋ yeŋ nurde hike kenenbe mata go ma teŋ hinayiŋ. ¹⁷Al Kurun beleŋ alya bereya doyaŋ yird yird bana goŋbe biŋgeya feya nen nen mata gobe det kurun moŋ geb, gago dinen hime. Munan dawet kurun wor pobe Al Kurun diliŋde huwak heŋ heŋ mataya biŋ kamke igiŋ heŋ heŋ matayabe Holi Spiritya heŋ aman heŋ heŋ mataya go goyen. ¹⁸Fudinde, al kura mata gwaha mat Yesu Kristu niŋ meten teŋ hiyenbe matamiŋ goke Al Kurun beleŋ amanen nurde hiyen, irde al hoyan wor al gote meten goke turun irde hinayiŋ.

¹⁹Niŋgeb neŋbe bininiŋ kamke heŋ heŋ mataya kadom tareŋ gird gird mataya goke kurut wor po yeŋ hitek. ²⁰Munan dula matatiŋ ge teŋ Al Kurunyen meten bulun ma irde hinayiŋ. Biŋgebe tumŋaŋ Al Kurun diliŋde wukkek geb, netek igiŋ ala. Goyenpoga al kadininiŋ kura biŋge goyen ma nene hitiŋ neteke denenbe dufaymiŋ bulun heke mata bulunŋde katyeŋ go gab bulunbe gogo titek. ²¹Niŋgeb kadtiŋ kura matatiŋ kenenbe mata bulunŋde katnak yeŋbe dapŋa wet ma wain wet kura goyen go ma nene hinayiŋ. Matatiŋ hoyan kura gwaha yirtek han kenem goyen wor gwaha ma teŋ hinayiŋ. Gwaha teŋ hinayiŋ gobe Al Kurun diliŋde mata igiŋ geb, gago dinen hime. ²²Dufaytiŋde biŋge ma wain ma mata

kura goke igin ala yen nurde hinayin kenem dufaytin goyen denya Al Kurunya hitte po hiyen. Al kura mata kura igin yen nurde ten hiyen irde goke mata bulun tihim yen binde bulunen ma nurde hiyen al gobe Al Kurun belen guram irde sanin iryen. ²³Gega al kura binde kura Al Kurun dilinde wukkek mon yen nurde kama hen hen ga niyyenbe gobe yingen ulinde merem yan hiyyen. Gobe dufayminde mata gwahadebe igin mon yen taren wor po ma irtin geb, dufay budam forok yitinde mat niyyen geb, gogo yingen ulinde merem yan hiyyen. Ningeb al kura mata kura igin ma bulun goyen kenkela bebak ma tenbe goke dufaymin taren ma irdeya mata goyen tiyyenbe mata bulun minyan hiyyen.

Kadtiŋ ge nurdeya ga mata ten hinayin

15 ¹Be, denya nenya Al Kurun niŋ dufayninin sanin irtin goyen kurun hitin marbe kadinin dufaymin taren wor po ma hitin gore mata kura son hekeb faran yurde hitek. Irde nindiken aman hetek belen po ma gama irde hitek. ²Nen dunken dunken kurun gayen tumnan kadinin igin hen hen ge nurdeb yen aman hetek irde taren hetek mata goyen po ten hitek. ³Yesu Kristu wor yingen amanen hen hen ge ma nurde hinhin. Gwaha titnenbe Al Kurunyen asande, “Al Kurun, al belen nayan girde han gobe ge ma girde han, ne nirde han,” yitin hi. ⁴Mere gobe nen gayen saba diren yen bikken wor po Al Kurunyen asande katin. Gobe nen belen mere go nurdeb kanduk yenen mukku ma ten goya goya sanin po hen kame Al Kurun belen igin diryen yen goke doyan hen hinayin yen gogo katin. ⁵Ningeb den goyen kanduk yenen mukku ma ten goya goya sanin po hen huward huward taren goyen dunen hiyen al Al Kurun gore guram dirkeb dindiken ulin dufay unken po hen awalikde po hiwon yen nurde hime. Go mata gobe Yesu Kristuyen alya bereya belen titek mata yen nurde hime. ⁶Gogab dufaytinya meretinya unken po yirdeb Doyan Al Kurunninin Yesu Kristuyen Nanin, Al Kurun denem turun yan irde hinayin.

⁷Ningeb Yesu Kristu belen den goyen igin dinyin gwahade goyen po, Al Kurun denem turun yan ird ird niŋ tenbe dindiken ulin kadam igin genen ten hinayin. ⁸Yesu Kristube Al Kurun belen hakot Yuda marte hakwamin yago hitte bin tiyyin goyen fudinde kawan forok yeke Yuda mar belen kenen bebak ten ten ninbe gogo Yuda mar gote meten al hen megen gar katin geb, gago kadam igin nurd gunen ten hinayin dinen hime. ⁹Be, Yesu megen gar katin gobe al min hoyan Yuda mar mon belen kenenbe Al Kurun belen buninen yirde hiyen goke denem turun yan irde hinayin yenbe gogo megen gar katin. Ningeb goke tenbe Dewit belen Al Kurunyen asande tikiŋ kura gahade kayyin:

“Ningeb ne gayen al min hoyan Yuda mar mon kahal bana hen turun girde hen.

Denge isan heŋ heŋ ge tikiŋ hewen,” yitiŋ hi.

Tikiŋ 18:49

¹⁰Irde kurabe:

“Al miŋ hoyan Yuda mar moŋ,
denbe alya bereyamiŋ Yuda marya aman henaŋ,” yitiŋ hi.

Saba 32:43

¹¹Be, mere hoyanbe gahade:

“Deŋ al miŋ hoyan Yuda mar moŋbe tumŋan Doyan Al Kurun turun
irde hinayiŋ.

Deŋ alya bereya megen haŋ tumŋan turun irde tikiŋ henayiŋ,” yitiŋ
hi.

Tikiŋ 117:1

¹²Irde Aisaia belen gahade kayyiŋ:

“Yesiyen⁸ minde niŋ al kura forok yiyyen.

Yeŋ belen al miŋ hoyan Yuda mar moŋ doyan yiren yeŋ wayyen.

Irkeb mel gobe yeŋ belen waŋ igiŋ yird yird niŋ doyan heŋ hinayiŋ,”
yitiŋ hi.

Aisaia 11:10

¹³Be, Al Kurunbe deŋ igiŋ dird dird goke doyan heŋ heŋ tareŋ duntiŋ.
Niŋgeb deŋ belen yeŋ ge hekkeŋ nurde hike Al Kurun belen goke aman
dufay kurun wor po dunwoŋ, irde bitiŋ yisikamke igiŋ hiwoŋ yeŋ
gusunaŋ irde hime. Gogab Holi Spirityen saŋiŋde Al Kurun belen kame
igiŋ diryen goke doyan heŋ heŋ matatiŋ gobe tareŋ wor po hiyyen.

Pol belen asan ga kayyiŋ gote miŋ momoŋ yiryiŋ

¹⁴Be, kadne yago, nebe fudinde wor po deŋ goyen mata igiŋ kurun teŋ
hanyen, irde Al Kurunyen mere nurd pasi hitiŋ haŋ, irde epte dindiken
uliŋ kadom saba gird teŋ hitek haŋ yeŋ nurde hime. ¹⁵Gega asan ga
kaŋ henyaŋbe saba kura goke bitiŋ bak yeŋ yeŋ ge kayhem. Irde Al
Kurun belen buniŋen nirde igiŋ igiŋ nirde hiyen geb, merene gake deŋ
belen dahade nurd nunnayiŋ yeŋ kafura ma henya kawan po kayhem.

¹⁶Fudinde, Al Kurun belen buniŋen nirde igiŋ igiŋ niryeŋ geb, al miŋ
hoyan Yuda mar moŋ hitte kuŋ meten teŋ hiyeŋ yeŋ Yesu Kristuyen
meten al niryiŋ. Niŋgeb nebe Al Kurunyen mere igiŋ Yesu niŋ yitiŋ goyen
tagalde tukunbe Al Kurun doloŋ ird ird mata doyan al pris yara heŋ al
miŋ hoyan Yuda mar moŋ goke meten teŋ himyen. Gogab al miŋ hoyan
Yuda mar moŋ gobe Holi Spirit belen wukkek wor po yirke Al Kurun
galak irke aman hetek det yara henayiŋ.

¹⁷Niŋgeb nebe Yesu Kristuya henbe Al Kurun niŋ meten teŋ himyen
goke nigen ge turun yaŋ nurde hime. ¹⁸Gega nebe det hoyan kura
goke mali mere titek ma nirde hi. Yesu Kristu belen meten titiŋ goke

* 15:12 Yesibe Israel marte doyan al kurun Dewit naniŋ.

po tagalde heŋ. Nebe yeŋ beleŋ hulyaŋ nirke kuŋ al miŋ hoyaŋ Yuda mar moŋ goyen Al Kurunŋ hitte yukumeke meremiŋ gama irde hinhan. Metenŋ go teŋ hinhemyabe Al Kurunŋyen merere saba yirde mataner mat Al Kurunŋ yikala yirde hinhem. ¹⁹Irde Holi Spirityen tarende mata tiŋen turnuŋ yaŋ wor po kurayen kurayen forok yirde hinhem. Irkeb mel gobe mata goyen yeneŋbe Al Kurunŋ hitte waŋ hinhan. Ningeb nebe gwahade po Yesu Kristu niŋ yitiŋ mere igiŋ goyen Yerusalem mat miŋ urde tukunŋ tukunŋ Ilirikum naŋa bana tagalde tukunŋ pasi himiriŋ. ²⁰Nebe naŋa kura Yesu Kristuyen mere momoŋ ma nurde hitiŋ bana goŋ kuŋ mere igiŋ goyen hugiŋen tagalde hitek nirde hiyen. Gogab al kura beleŋ bikken kuŋ metenŋ teŋ Yesuyen alya bereya forok yirtiŋde gor sopte naŋa tiŋenŋde metenŋ titiŋ yara ma tiyeŋ. ²¹Go teŋ himyen gobe Al Kurunŋyen asaŋde katiŋ gwahade po teŋ himyen. Mere gobe gahade:

“Al kura yende mere momoŋ ma nurtiŋ mar beleŋ kennayiŋ.

Al kura yende mere ma nurtiŋ mar beleŋ nurde bebak tinayiŋ,” yitiŋ hi.

Aisaia 52:15

Rom kuŋ kuŋ niŋ yiriŋ

²²Be, yitiŋ gwahade po nebe meremiŋ ma kutiŋ naŋa bana gaŋ metenŋ budam forok yeŋ hanŋyen geb, gago deŋ hitte kuŋ kuŋ niŋ meteneŋ nirde hiyen. ²³Gega naŋa gayen bana tiyuŋ kura ne kuŋ metenŋ titek kuram moŋ, irde dama budam deŋ dentek wor po nirde hiyen geb, ²⁴Spein naŋare kuŋ heŋyabe deŋ hitte forok yeŋ denenŋ gab kweŋ yeŋ nurde hime. Beleŋ goyaŋ gore kuŋ heŋyabe deŋ hitte kuŋbe denŋa muŋ kura heŋ amaŋ heŋ gab dubul teŋ kweŋ. Irkeb ne gayen Spein naŋare kuŋ kuŋ niŋ faraŋ nurwoŋ yeŋ nurde hime. ²⁵Munaŋ gayamuŋ gayenbe Yerusalem niŋ Al Kurunŋyen alya bereya goke teŋ metenŋ tiyeŋ yeŋ gor kweŋ tihim. ²⁶Masedonia naŋaya Akaia naŋaya bana niŋ Yesuyen alya bereya beleŋ Yerusalem niŋ Al Kurunŋyen alya bereya haŋ bana goŋ det niŋ amu heŋ haŋ mar goyen faraŋ yurd yurd niŋ amaŋenŋ nurdeb hora yeraŋ geb, gago hora goyen yade Yerusalem kweŋ tihim. ²⁷Mel gobe faraŋ yurd yurd niŋ amaŋenŋ nuraŋ. Goyenbe fudinde gwaha yirtek po faraŋ yurde haŋ. Al Kurunŋyen gasuŋde niŋ det Yuda mar beleŋ titiŋ goyen al miŋ hoyaŋ Yuda mar moŋ wor yeŋ hitte mat gab yawaramiŋ geb, goyen wolminiŋ megen niŋ samuŋ beleŋ faraŋ yurtek haŋ geb, gogo faraŋ yuraŋ. ²⁸Ningeb mel gore hulyaŋ niraŋ gayen pasi ireŋ. Irde Yerusalem mar goyen hora ga tumŋaŋ teke yeneŋbe gor mat Spein beleŋ kweŋ. Kuŋ belenbe deŋ hitte forok yeweŋ. ²⁹Ne deŋ hitte kumekeb Yesu Kristu beleŋ denŋa neya tumŋaŋ guram dirde saŋiŋ wor po diryeŋ yeŋ nurde hime.

³⁰Be, kadne yago, nebe Al Kurunŋyen metenŋ teŋ heŋya metenŋ goke Al Kurunŋ gusuŋaŋ irde himyen. Ningeb deŋ wor neya dufay unŋkurenŋ po irde hugiŋen tareŋ po Al Kurunŋ gusuŋaŋ irde hitek yeŋbe gago Doyaŋ Al

Kuruṅniniṅ Yesu Kristuyen tareṅ hende huwarde gusuṅaṅ dirde hime. Holi Spirityen saṅiṅde ne niṅ amaṅeṅ nurde haṅ geb, gago gusuṅaṅ dirde hime. ³¹Gusuṅaṅ irde heṅyabe ne gayen Yudia naṅare niṅ mar kura Yesuyen mere gama ma irde haṅ mar gore buluṅ nirtak belṅeṅmiṅ goyen Al Kuruṅ belēṅ pet teṅ teṅ niṅ gusuṅaṅ irde hinayiṅ. Irde Yerusalem niṅ Al Kuruṅyen alya bereya farāṅ yurd yurd niṅ nurde kuṅ meteṅ teṅ heṅ goyen mel gore igiṅ nurnayiṅ yeṅ gusuṅaṅ irde hinayiṅ. ³²Gogab Al Kuruṅyen dufay kenem deṅ hitte amaṅ dufay hende kweṅ, irde deṅya neya tumṅaṅ sopte tareṅ hetek. ³³Al biṅ yisikamke igiṅ heṅ heṅ al Al Kuruṅ belēṅ deṅ kuruṅ goya tumṅaṅ hinayiṅ. Fudinde wor po.

Kadom niṅ yiriṅ

16 ¹Be, nebe Fibi niṅ momoṅ direṅ tihim. Yeṅbe Senkria taunde niṅ Yesuyen alya bereya sios niṅ meteṅ teṅ hiyen. Yeṅbe Al Kuruṅ diliṅde nende hayniniṅ wor po yara hitiṅ. ²Be, bere gayen kukeb Doyaṅ Al Kuruṅ niṅ teṅbe gargar irnayiṅ. Mata gobe Al Kuruṅyen alya bereya belēṅ titek mata geb, gwaha irnayiṅ. Irde farāṅ niṅ nurde hikeb deṅ belēṅ farāṅ urde hinayiṅ. Yeṅbe al budam farāṅ yurde hiyen. Ne manāṅ farāṅ nurde hiyen geb, gago dineṅ hime.

³Prisilaya Akwilaya niṅ dufay heṅ himyen goke ire unṅya goyen momoṅ yirnayiṅ. Ire unṅya gobe meteṅ kadne, Yesu Kristu niṅ meteṅ teṅ haryen. ⁴Ire unṅya gobe ne farāṅ nurye yeṅbe kamde kamde niṅ ma nurde hinaryum. Ne po moṅ Yesuyen alya bereya hitiṅ al miṅ hoyāṅ Yuda mar moṅ wor tumṅaṅ ire unṅyat meteṅ goke igiṅ wor po nurde hityen.

⁵Yesu Kristuyen alya bereya sios, ire unṅya gote yare gabu irde haṅyen mar goke wor dufay heṅ himyen geb, goke momoṅ yirnayiṅ. Irde kadne wor po Epainetus manāṅ gwahade po innayiṅ. Yeṅbe Esia naṅa^h bana goṅ yeṅ wa Yesu nurd unyiṅ.

⁶Maria wor gwahade po, ne belēṅ yeṅ ge dufay heṅ hime goyen innayiṅ. Yeṅbe deṅ ge teṅ meteṅ tareṅ wor po teṅ hiyen.

⁷Irde nere miṅde niṅ al irawa Andronikusya Yuniasya goke dufay heṅ himyen goke momoṅ yirnayiṅ. Irem gobe neya tumṅaṅ koyare hinhet. Yeṅbe Yesu Kristuyen mere basaṅ mar aposel buda kura bana niṅ yeṅ nurd yuneṅ haṅyen. Yeṅ wa Yesu nurd unke gab kame ne wor Yesu nurd unmiriṅ.

⁸Irde Ampiliatus niṅ wor dufay heṅ himyen geb, momoṅ irnayiṅ. Yeṅbe Doyaṅ Al Kuruṅyen diriṅ yeṅ nurdeb yeṅ ge amaṅeṅ nurd uneṅ himyen.

^h 16:5 Esia naṅa gobe gayenter niṅ Esia naṅa kuruṅ goke ma yitiṅ. Gayenterbe Turki inēṅ haṅyen.

- ⁹Be, Urbanusbe Yesu Kristu niŋ meterŋ teŋ hiyen. Yeŋbe meterŋ kadniniŋ wor po. Stakis wor gwahade po, yeŋ ge amanŋ wor po nurd unŋ himyen geb, ne belŋ yeŋ ge dufay heŋ himyen goyen momoŋ yirnayiŋ.
- ¹⁰Irde Ampeles wor ne belŋ yeŋ ge dufay heŋ himyen goyen momoŋ irnayiŋ. Yeŋbe Yesu Kristu gama irde heŋya kanduk yeneŋ hinhin gega, bada ma hiriŋ goke Yesu belŋ nigen al wor pobe gago yeŋ kinyiŋ.
- Irde Aristobulusyen yare haŋ mar goke wor dufay heŋ himyen geb, goke momoŋ yirnayiŋ.
- ¹¹Nere miŋde niŋ al kura Herodion niŋ dufay heŋ himyen goyen momoŋ irnayiŋ.
- Irde Narsisusyen yare haŋ mar niŋ dufay heŋ himyen goyen momoŋ yirnayiŋ. Mel gobe Doyaŋ Al Kurunya haŋ.
- ¹²Irde Trifinaya Trifosaya niŋ dufay heŋ himyen goyen momoŋ yirnayiŋ. Bere irawa gobe Doyaŋ Al Kurun niŋ meterŋ saŋiŋ wor po teŋ haryen. Kadne wor po Persis niŋ dufay heŋ himyen goyen wor momoŋ irnayiŋ. Yeŋ manaŋ Doyaŋ Al Kurun niŋ meterŋ tareŋ wor po teŋ haŋyen bere kurabe gogo.
- ¹³Irde Rufusya miliŋya niŋ dufay heŋ himyen goyen momoŋ yirnayiŋ. Rufusbe Doyaŋ Al Kurun belŋ basaŋa iryiŋ. Miliŋbe mamne yara hitiŋ.
- ¹⁴Irde Asinkiritusya Flegonya Hermesya Patorobasya Hermasyabe kadom weŋ mel goya haŋ mar tumŋaŋ goke dufay heŋ himyen goyen momoŋ yirnayiŋ.
- ¹⁵Irde Filologus, Yulia, Nereus, irde Nereus haymiŋya, Olimpás, irde Al Kurunyen alya bereya mel goya haŋ mar goyen tumŋaŋ ne belŋ yeŋ ge dufay heŋ himyen goyen momoŋ yirnayiŋ.
- ¹⁶Deŋbe kadom pere gird teŋ hinayiŋ. Mata gobe Al Kurun diliŋde wukkek dinyeŋ.
- Gar niŋ Yesu Kristuyen alya bereya belŋ tumŋaŋ deŋ ge dufay heŋ haŋ goyen momoŋ yirayiŋ ninaŋ geb, gago momoŋ dirde hime.

Saba funaŋ

¹⁷Be, kadne yago, dufaytiŋ buluŋ irde deŋ bana bipti forok irtek al niŋ keŋkela heŋ ga hinayiŋ. Irde al kura saba hoyan dirde deŋ saba nuramiŋ goyen gama ird ird belŋ pet teŋ duntek al goke wor keŋkela heŋ ga hinayiŋ. Al gwahade gobe yilwa po yirde hinayiŋ. ¹⁸Go mar gobe Doyaŋ Al Kuruniniŋ Yesu Kristu niŋ ma meterŋ teŋ haŋ. Yiŋgeŋ ge po nurde mata gogo teŋ haŋyen geb, gago dineŋ hime. Go mar gobe al kura mel gote mere goyen buluŋ yeŋ bebak titek moŋ mar goyen hapek yaŋ nurde fudinde yetek mat po usi mere yirde haŋ.

¹⁹Be, den belen Al Kurunyen mere gama irde han gote mere momoninbe al tumhan nurd pasi hen han geb goke amanen wor po nurde hime. Goyenpoga den goyen mata igin ten henya kenkela dufay hen ga ten hinayin. Irde mata bulunbe mata bulun ten ten dufay minmon wor po hinayin yen gago mere taren po dirde hime.

²⁰Be, al bin yisikamde hiyen al Al Kurun belen hen ga mon Satan gote sanin ten sina irke den belen ufurka tinayin.

Doyan Al Kuruninin Yesu Kristu belen den goyen buninen dirde igin igin dirde hiwon yen gusunan irde hime.

²¹Be, meten kadne Timoti belen den ge dufay hen hiyen goyen momon yirayin ninkeb gago momon dirde hime. Nere minde nin al Lusius, Yesonyabe Sosipaterya wor gwahade po.

²²(Be, nebe Tertius. Pol belen ninke asan gago kan hime. Ningeb ne wor Doyan Al Kurun nin ten den ge dufay hen hime gake bebak dirde hime.)

²³⁻²⁴Be, Gaius belen den ge dufay hen hi goke bebak dirde hime. Yen belen ne Pol gayen gargar nirde hiyen. Irde Yesu Kristuyen alya bereya sios gar nin wor yen belen faran yurde hiyen.

Be, taun gate gabmanyen hora doyan ird ird marte doyan al Erastusya kadninin Kwartusya wor den ge dufay hen haryen goke momon dirde hime.

²⁵Be, den hitte kun Yesu nin yitin mere igin goyen tagalde kun himekeya den goyen igin taren dirtek albe Al Kurun gog po. Ningeb Al Kurun goyen denem turnun yan irtek. Mere igin gobe damam damam banare hinhin geb, al belen epte ma bebak titek hinhin.

²⁶Gega Al Kurun gwahader hitin gore mere basan marmun yinke asande kayamin goyen gayenterbe min kawan forok yitin han. Irkeb al min kurayen kurayen tumhan Yesu nin dufaymin taren irde meremin gama irde han. ²⁷Ningeb Al Kurun, yen po ga dufaymin wukkek goyen Yesu Kristu faran durkeb huginen denem turnun yan irde hitek! Fudinde wor po.